



SADA _KITAI




ISBN 978-967-19517-0-5

SADA KITAI

Sarawak Islamic Information Centre
KCLD, Block 10, Jalan Ong Tiang Swee, 93200 Kuching, Sarawak, Malaysia.

First edition: 2020

All rights reserved. No part of this publication may be reproduced, stored in a retrieval system, or transmitted in any form, by any means, electronic, mechanical, photocopying, recording, or otherwise, without the written permission of the Sarawak Islamic Information Centre.



SADA
— KITAI

MOTIFS OF THE COVER PAGE



Rafflesia is the largest flower in the world.

Normah Orchid (*Phalaenopsis Bellina*) is the official State Flower of Sarawak.



Pitcher plant or Monkey Cups is one of the most remarkable and interesting plants in Sarawak.

Pua Kumbu is a traditional patterned, multicolored ceremonial cotton cloth used by the Ibans in Sarawak.



CONTENTS

01

Kabua islam ngemeratka ngiga pemandai, pengelandik sereta penemu

04

Hari raya aidil adha 1

08

Hari raya aidil adha 2

12

Pendiau enggau pemanah ulah rasulullah s.a.w

15

Nabi sereta rasul: Nabi ulul azmi
nabi nuh a.s
nabi ibrahim a.s

24

Adat bekaling, bekaban tauka besulu ba dalam islam

27

Ngajar anak chara islam

30

Pengelelebih indai

33

Ungkup nembiak mit dalam islam

37

Nemuai ngagai pangan diri'

40

Aidilfitri

43

Fiqh urang indu': Adan aurat indu'

46

Fiqh urang indu': Behijab nutup aurat

50

Ngemendarka janji semaya ulah ti manah

53

Pemanah pengawa' pemeresi dalam islam

57

Imam as-syafie 1

60

Imam as-syafie 2

63

Bini solehah

66

Maulidurrasul

70

Tanggung pengawa apai indai enggau bala anak rebak baru

ACKNOWLEDGEMENT

Sarawak Islamic Information Centre would like to express their sincere thanks and gratitude to Jabatan Penyiaran Sarawak (RTM) for their collaboration in the production of the radio program and the following individuals involved in the production of the book.

Translators & Editors:

Haji Fadlullah Fadilah Abdullah @ Matteus Naong

Haji Norhaza Ahmad Redzuan bin Abdullah @ Edwin anak Arah

Ustaz Yakub bin Abdullah @ Lidum ak Sampau

Siti Nur Hidayah Abdullah @ Jelinie anak Pira

Damia Alyaa Maisarah @ Patricia anak Griffin

The Centre also would like to thank Persatuan Dayak Muslim Kebangsaan (PDMK) who have contributed in the production of the book.

FOREWORD

One of the functions of the Sarawak Islamic Information Centre is to mainstream information and knowledge on Islam. The use of the electronic media that is the radio, for this purpose is very much relevant and significant for Sarawak.

Sada Kitai (in Iban) is a radio program that the Centre initiated in 2015 in collaboration with Radio Televisyen Malaysia (RTM) Sarawak. The focus was on noble values in Islam, values that cut across cultures and traditions such as respect for parents and elders, compassion and love for children, the importance of hygiene and cleanliness as well as business ethics. In addition, attributes of our beloved Prophet Muhammad S.A.W were shared with the listeners.

We believe that in order for such information and knowledge to reach out to a wider audience, for posterity purposes, they have to be collated or assembled into a book. We are very much indebted to Persatuan Dayak Muslim Kebangsaan (PDMK) for making time and putting in so much effort in editing and translating the information into comprehensible written text. Alhamdulillah.

Thank you especially to Hj Norhaza Ahmad Redzuan, Damia Alyaa Maisara, Siti Nur Hidayah Abdullah, Hj Fadlullah Abdullah, and Yakub Abdullah. May ALLAH reward each and every one of you for your time and contributions, Insya-Allah.

Of course **Sada Kitai** would not be able to run successfully without a dedicated and committed team from our Centre. My heartfelt appreciation goes to all members of the team.

Thank you.

HJH ZABARIAH HJ MATALI

Chief Executive Officer

01_

**KABUAH ISLAM NGEMERATKA
NGIGA PEMANDAI, PENGELANDIK
SERETA PENEMU.**



33

Umat islam khususnya di Sarawak ini disarankan untuk berusaha meningkatkan tahap pendidikan bagi setiap umat islam agar lebih berintegriti dan berwawasan.

**Yang Amat Berhormat Datuk Patinggi Abang Haji
Abdul Rahman Zohari Bin Tun Abang Haji Openg**

Ketua Menteri Sarawak

Islam sigi ngemeratka umat iya ngiga sereta nambahka pemandai, penglandik sereta penemu. Mayuh ayat ba dalam Al-Quran ti ngasuh semua mensia macha sereta ngiga penemu, lalu nerangka nama kebuah chukup penting ba umat Islam berunding sereta belajar.

Lebuh Al-Quran diturunka, leka jaku ka terubah ia diturunka ia nya 'Iqra' reti ianya 'baca'. Firman Allah s.w.t ti reti iya:

"Bacha! Dalam nama Tuhan nuan ti ngaga (semua utai).IYA ngaga mensia ari darah ti meku.Bacha meh! Lalu Tuhan nuan Pemadu Penyinu. Ti udah ngajar (nulis) enggau pen. Iya udah ngajar mensia ti enda nemu utai."

Urang ti ngembuan pemandai sereta penglandik sigi diberi endur ti tinggi dalam mayuh jaku pesan Nabi s.a.w. Nabi Muhammad s.a.w dalam siti hadis bejaku ti reti iya:

"Ngiga penemu/pemandai pengawa ti wajib ba tiap iku Muslim"
(Hadis Ibnu Majah enggau At-Tabrani)

Lalu kebuah penemu tauka pemandai tu utai ti chukup penting, Allah merintah Rasul Iya s.a.w ngiga penemu/pemandai ti mayuh agi. Allah befirman ti reti iya:

"Sebut meh: O Tuhan! Tambahka meh pemandai aku" (Al-Quran:20:114)

Nabi s.a.w ngewajibka pengawa ngiga penemu sereta pemandai ba tiap iku urang Islam lalu nerangka peninggi pangkat urang ti ngembuan penemu enggau pemandai, dibandingka enggau urang ti semina beribadah ba peninggi bulan ti terang ari bintang-bintang ti mayuh ba langit.

Nabi s.a.w mega nerangka urang ti pandai sereta landik (*ulama*) nyadi urang ti nampung pengawa sida Nabi lalu Allah mega muji sida iya ti enda ninggalka reta tengkira tang ninggalka penemu tauka pemandai ti ulih diguna bala bukai ka nyadi penguntung ti besai.

Kelimpah ari nya mega, Nabi s.a.w nerangka urang ti ngiga pemandai/penemu sigi benung bejalai tama ngagai pintu-pintu serega. Nabi s.a.w bejaku ti reti iya;

"Sapa-sapa ti nitihka jalai deka ngiga pemandai/penemu, Allah ngemuntangka jalai ngagai Serega ngagai iya." (Al-Bukhari)

Pemandai mega mai upah ti besai. Urang ti ngajar urang bukai ngagai siti pengawa ti manah, tetap baka urang ti ngerejaka pengawa ti manah nya. Lalu enti urang ti pandai/landik tu udah mati, upah Allah s.w.t ngagai iya enda badu naka nya, tang sigi terus diulih iya ngelama penemu/pemandai iya diguna urang bukai.

Nabi s.a.w *besabda*: " *Enti mati siku anak Adam (mensia), semua amal iya lalu putus kelimpah ari tiga bengkah amal; sedekah ti enda putus, pemandai/penemu ti beguna sereta anak ti soleh ti bedoa ka iya.*"(Muslim)

Penemu/pemandai nya sigi utai ti sigi beguna ti enda ulih disalah agi. Jaku pesan Nabi s.a.w ti mulia ti ngemeratka penemu / pemandai ba dalam pengidup kitai. *Tamadun* Islam ti ditampung kitai sari tu mega asil ari penemu/pemandai ti diguna sereta dikuasa lalu diguna ka penguntung semua raban mensia ba dunya.

Nya kabuah, kitai umat Rasulullah s.a.w, chukup ngemberatka kitai nambah penemu/pemandai, ngambi ka kitai nyadi raban ti pengambis manah dipeda Allah s.w.t. Ngarapka Allah s.w.t merekat kitai enggau bala kitai sebilik, enggau penemu sereta pemandai ti nguntungka kitai ba dunya tu sereta kelebihan agi ba' ari akhirat ila. Ngarapka Iya mega ngiring kitai enggau jalai ti bendar dalam ngena pemandai sereta penemu, nitihka jalai pengrindu Iya. *Amin, Ya Rabbal 'Alamin*

02_

HARI RAYA AIDIL ADHA _1



33

Kekalkan keharmonian dan perpaduan masyarakat berbilang kaum dan agama di Sarawak demi kemakmuran bersama.

**Yang Amat Berhormat Datuk Patinggi Abang Haji
Abdul Rahman Zohari Bin Tun Abang Haji Openg**

Ketua Menteri Sarawak

Hari Raya Aidiladha (bahasa Arab: عيد الأضحى Eid Ul-Adha) atau **Hari Raya Haji** sigi pengrami ti diintu semua umat Islam ba dunya. Ia sebengkah ari pengrami ti pengambis besai kelimpah ari Hari Raya Aidilfitri ti diintu tiap 1 *Syawal*. Nyadi Hari Raya Aidiladha tu diintu leboh ari ke-10, 11, 12 sereta 13 bulan Zulhijjah niting tahun.

Hari Raya tu berengkah enggau Takbir Aidiladha leboh malam 10 Zulhijjah, ditangkan enggau *solat sunat* Aidiladha sereta khutbah /Licha Aidiladha leboh pagi 10 Zulhijjah.

Lalu udah nya ditangkan agi enggau pengawa *ibadah korban* / tauka nyemelih jelu korban. Pengawa tu semina ulih dikerejaka leboh 4 ari aja berengkah ari maya *khatib* tadi tembu macha *khutbah* iya. Lalu 4 ari nya tadi iya nya, sekali ka leboh ari 10 tauka 11 tauka 12 sereta siang ari 13 Zulhijjah, ti dikumbai Hari Tasyrik.

Aidiladha iya nya siti pengrami besai ngagai umat Islam ngingkat sereta ngenang jerita pengawa *korban* Nabi Ibrahim a.s. leboh ngerejaka perintah Allah sereta pepadu penyabar anak iya Nabi Ismail a.s. dalam nitihka perintah Allah s.w.t.

Kitab Tafsir Ibn Kathir bisi nyeritaka ka terubah iya, Nabi Ibrahim a.s nadai bulih purih taja pan iya enyau mansang tuai. Tang iya enda pungkang bedoa sereta *bemunajat* ngagai Allah s.w.t ngambika bulih purih tauka anak.

Nyadi enggau kuasa Allah s.w.t ti enda disadang leboh iya beumur 86 tahun nitih ka sekeda riwayat, iya diberi anak ka terubah ti benama Ismail ari bini iya ti ka dua ianya Siti Hajar. Lalu udah Nabi Ismail mansang besai, sebengkah penguji ti berat diturunka Allah s.w.t ngagai seduai menyanak tu enggau tuju deka nguji *keimanan* enggau *ketakwaan* seduai iya ngagai Allah s.w.t. Allah s.w.t merintah Nabi Ibrahim a.s nyemelih anak ti dikesayau ka iya.

Lalu umur Nabi Ismail a.s. maya nya sida sekeda ahli Tafsir madah umur iya 7 tahun lalu bisi mega madah 13 tahun. Taja pan ati ti

berat Nabi Ibrahim madahka perintah Allah ngagai anak iya, Ismail, tang nya perintah Allah s.w.t ti wajib dikerejaka.

Enggau ati ti tusah, Nabi Ibrahim a.s madahka perintah Allah s.w.t nya ngagai Nabi Ismail a.s, tang utai nya enda ngenyitka Nabi Ismail tang iya bejaku:

“O apai kerejaka meh utai ti diperintahka nya, ngambika nuan nemu aku tu dalam raban urang ti sabar.”

Jerita pengawa korban Nabi Ibrahim a.s enggau Nabi Ismail a.s. ti sanggup mutuska seput kebuah bulih pengrindu sereta *redha* Allah s.w.t. sereta ngaku setiap utai berega ba dunya tu semina empu tauka penggi Allah s.w.t, lalu iya aja ti ulih ngambi sereta meri nama aja utai.

Baka ka ditemu kitai, perintah Allah s.w.t tu sigi deka nguji Nabi Ibrahim a.s. senentang pengamat iman iya ngagai Allah s.w.t. Laban sitan kala madahka kebuah Nabi Ibrahim a.s nya beiman enggau Allah laban Allah meri iya anak tauka purih.

Lalu ba pengujung jerita baka ka ditemu kitai mega Nabi Ibrahim a.s. tetap mega ngerejaka perintah Allah nya enggau nyemelih anak iya enggau lungga. Lalu lebu lungga nya terengkah ba kulit rekung Nabi Ismail a.s. dia Allah s.w.t lalu nerima korban Nabi Ibrahim a.s. sereta nukar Nabi Ismail a.s. enggau siku Qibasy / sebengkah kambin ti besai lalu Nabi Ismail a.s. mega diselamatka Allah s.w.t.

Ari Zaid bin Arqam, ku iya bisi sari nya bakih Rasulullah s.a.w betanya ti reti iya: *O Rasulullah, nama utai ti bisi ba korban nya?* **Saut Rasulullah s.a.w:** *la sigi sunnah apai kita, Ibrahim.* **Sida betanya:** *Nama ti diulih kami ari pengawa nya deh O Rasulullah?* **Rasulullah nyaut:** *Ba tiap urat buk bisi upah ti manah.* **Sida bejaku:** *kati ba bulu iya O Rasulullah?* **Rasulullah s.a.w nyaut:** *Ba tiap iti bulu nya bisi upah pemanah.* (Hadis riwayat Ahmad, Ibnu Majah enggau Tirmizi)

Nya meh sekeda penerang senentang Hari Raya Aidil Adha tu ti bepun ari ngenang pengawa korban Nabi Ibrahim a.s. ti dikerejaka kebuah deka ngemendarka perintah Allah s.w.t.

Lalu kitai anang alah enggau sekeda urang ti ngumbai ari tu urang Islam ngerami Aidil Adha kebuah ngerami pengawa siku apai urang ti nyemelih anak iya. Nya sigi jaku urang ti nadai penemu sereta sigi kepapas ka agama Islam. Tang pengrami tu ti ka bendar nya ngenang penyanggup siku Nabi ti sanggup ngereja nama aja perintah ari Tuhan iya, taja pan iya diasuh ngerejaka pengawa munuh anak ti pemadu dikasih ka iya. Tu meh tanda urang ti bendar-bendar kasih sereta rindu ka Tuhan lebih ari semua utai ti bukai.

Lalu nadai meh mensia bukai kala nyepi diuji Allah s.w.t baka Nabi Ibrahim a.s. Nya alai kitai umat Nabi Muhammad s.a.w sigi diperintahka ngenang sejarah tu ngambika kitai ulih nyadi umat ti *betaqwa*.

03_

HARI RAYA AIDIL ADHA _ 2



9 Zulhijjah ninting taun, dikumbai Hari Arafah. Lalu maya nya *umat* Islam ari sereta menua tu mansang begempuru ba Padang Arafah nanda ka berengkah pengawa ibadah Haji. Padang Arafah tu sebengkah padang pasir ba pelilih menua Mekah ba Saudi Arabia ti penyauh iya ari Mekah kurang lebih 25 km.

Lalu sejarah Padang Arafah tu, sekeda riwayat madahka tu meh endur Nabi Adam a.s. enggau Siti Hawa ka terubah ia betemu baru udah seduai iya diturunka ari Serega. Lalu tu meh endur taubat Nabi Adam a.s. diterima Allah s.w.t. Nya alai pengawa wukuf tu dikerejaka ngambi ulih ngenang sejarah tauka mulaika pengingat senentang Nabi Adam a.s.

Nyadi ngagai sida ka ngereja *ibadah* Haji, pengawa duduk ba padang Arafah lebuah ari 9 Zulhijjah nya nyadi pengawa rukun ti enda tau enda dikerejaka. Barangsapa ti enda ulih ngenataika diri maya nya enda sah Haji sida iya.

Lalu maya sida iya begempuru ba Padang Arafah tu, dia sida iya niri ka solat Zuhur sereta ninga khutbah hari Arafah. Lalu udah nya sida iya bemunajat, bedoa ngagai Allah s.w.t.

Allah s.w.t sigi ngemuliaka hari *wukuf* ba Arafah. Hari nya, Allah ngenampihka iya empu enggau cukup dampih ba urang ti' Wukuf ba Arafah ngambika ninga leka jaku sereta utai ka dalam ati sida, meda' enggau dampih mua sereta ulah sida. Nabi Muhammad s.a.w besabda ti reti iya:

"Iya ka bendar Allah s.w.t muji sida ti benung wukuf ba Arafah ngagai bala raban ba langit lalu bejaku ka sida iya: "Peda meh ngagai bala ulun Aku ti datai ngagai Aku." (Riwayat Imam Ahmad).

Dalam Hadis bukai Nabi s.a.w besabda ti reti iya:
"Iya (Allah) nampihka diri ngagai urang ti ba Arafah. Enggau gaga Iya betanya ngagai sida malaikat, nama ti diinginka bala urang ti wukuf nya?"

Maya hari nya, Allah s.w.t rindu amat enti kitai bedoa ngagai Iya. la ngemendarka semua doa/peminta sida Iya dia, baka ka disebut dalam hadis ti bukai:

“Ba antara mayuh jenis dosa, bisi dosa ti enda ulih dibayar kelimpah ari ngerejaka Wukuf ba Arafah” (disanadka Ja’far bin Muhammad sampai ngagai Rasulullah s.a.w).

Lalu ngagai urang ti enda ngerejaka pengawa ibadah Haji, disunatka ngagai sida Iya bepuasa, bezikir sereta pengawa sunat ti bukai. Bepuasa Sunat Arafah ulih meri upah pahala ti chukup besai baka sabda Rasulullah s.a.w ti reti Iya;

“Berpuasa ba Hari Arafah ditiap ditiis Allah nyadi pemuai dosa ti setahun sebedanya sereta ti nangkannya.” (Hadis riwayat Muslim).

Ari Abu Qatadah al-Anshari r.a.; Rasulullah s.a.w ditanya senentang bepuasa ba hari Arafah. Lalu Baginda besabda ti reti Iya: *“Ia nebus dosa setahun ti udah ngelebus sereta setahun ti deka datai.”* (Hadis Riwayat Imam Muslim).

Pia mega Rasulullah s.a.w ti bersabda ti reti Iya:

*“Orang ti bepuasa lebu**Hari Arafah** (9 Zulhijjah), Allah sigi nuliska ngagai Iya **puasa 60 tahun** sereta Allah nuliska Iya nyadi urang ti **taluk.**”*

Lalu senentang pengawa bepuasa tu mega, ulama madahka kitai ulih bepuasa sunat ba 10 hari dalam pun bulan Zulhijjah laban ngembuan pahala ti besai ari tisi Allah s.w.t.

Diriwayatka ari Ibn Abbas r.a., Rasulullah s.a.w besabda ti reti Iya: *“Nadai agi amal soleh ti dikerejaka ba hari-hari bukai ti chukup dikerinduka ari hari-hari tu (sepuluh hari ka berubah dalam bulan Zulhijjah).”* (Hadith Riwayat al-Bukhari)

Dalam hadis ti bukai ti diriwayatka ari Hunaidah bin Khalid, ari bini Iya, dari sekeda bini Nabi s.a.w:

“iya ka bendar Rasulullah s.a.w ngerejaka puasa sembilan hari ba pun bulan Zulhijjah, lebuH Hari Asyura sereta tiga ari ba tiap bulan iya nya ari Isnin ti terubah sereta dua ari Khamis ti ninting nya.” (Hadith Riwayat Imam Ahmad enggau an-Nasa’ie)

Rasulullah s.a.w besabda ti reti iya: *“Celaka meh urang ti enda bulih ungkup ti manah lebuH ari-ari sepuluh, jaga meh kelebih agi bepuasa ba hari kasembilan Zulhijjah laban ditiap sida ka nemu niap utai.”* (Riwayat Abu Dardaa.)

Lalu nya meh sekeda pengawa ti ulih dikerejaka kitai ti enda ngerejaka ibadah Haji. Taja pan baka nya, ka batang ia, kitai bala Iban Muslim mesti bisi juluk ati deka ngerejaka ibadah Haji ba Baitulharam. Barangsapa ti bedau bisi muka bup akaun ba Tabung Haji, ulih meh bepun nyimpan mimit-mimit. Insya Allah, enti kitai udah bisi niat deka ngerejaka ibadah Haji, Allah sigi meri jalai ka kitai. Lalu pama duit kitai udah chukup RM1300.00 ulih meh kitai ngerista nama diri deka ngerejaka ibadah Haji. Lalu terpulai meh ngagai Tabung Haji netapka taun sereta maya kitai ngereja Haji nitihka kuota ti udah ditentuka.

04_

PENDIAU ENGGAU PEMANAH ULAH RASULULLAH S.A.W



33

Kita mahu lahirkan generasi islam berkebolehan tinggi dengan pelbagai kemahiran.

Yang Berhormat Datuk Dr. Haji Abdul Rahman Bin Haji Junaidi

Menteri Muda di Jabatan Ketua Menteri (Hal Ehwal Agama & DBKU)
dan Menteri Muda Utiliti Sarawak (Bekalan Air)

Nabi Muhammad s.a.w tu urang ti pepadu manah. Tiap ulah tauka utai ti digaga iya datai ari *wahyu* Allah s.w.t. Ari ulah iyaka manah nya tadi, lalu dititihka urang ti bukai. Sigi patut, ulah ka manah Nabi Muhammad s.a.w tu dititihka kitai.

Antara ulah nya tadi, ianya pengering diri nyengkaum ulah sabar, pengampun, beterima kasih, imun, enda bebula serta mayuh macham agi. Enti kitai berati tauka macha jerita Nabi Muhammad s.a.w tu, Nabi Muhammad s.a.w sebenar iya selalu berjaku serta begulai manah enggau urang ba keliling iya. Iya enda ngira sapa-sapa, bagi iya semua mensia nya sebaka. Iya mega semampai malas utai ti jai enggau chara ti manah. Kelimpah ari nya, Nabi Muhammad s.a.w mega rinduka nemiak mit, anak patu balu, urang ti seranta serta mega bebasaka urang ti tuai.

Kelimpah ari nya mega, Nabi Muhammad s.a.w semampai ngajar nemiak sereta nunjukka ulah ti manah ka sida. Iya semampai meri *salam* lebuh maya betemu enggau semua urang. Iya mega seruran ngabas urang ti sakit. Kelimpah ari manah enggau urang bukai, Nabi Muhammad s.a.w mega siku mensia ti pepadu sayau ka jelu.

Nabi Muhammad s.a.w mega ngajar kitai ulah bebasa serta nerima jaku ajar orang bukai, enda ngira pengarap urang ba dunya tu. Ngambika chunto, Nabi Muhammad s.a.w kala meri pendar ngagai urang Nasrani ari Najran ti datai ka Madinah, sembiang ba tisi Masjid Madinah. Udahnya, Nabi Muhammad s.a.w lalu meri jaku lalau ngagai bala pangan iya, awakka bala sida iya nyaga pemanah kaul enggau urang bukai mega.

Kena negika pengarap Islam, ngambika tegap sereta tegut agi, Nabi Muhammad s.a.w sigi ngemeratka amat pengawa kaul mensia mayuh. Ba Nabi Muhammad s.a.w, semua urang sebaka magang. Kelimpah ari nya Nabi Muhammad s.a.w mega ngajar bala sida ti Islam, awakka enda ngemediska ati pangan diri.

Nabi Muhammad s.a.w mega ngelalau, awakka kitai ngembuan pengawa betulung, ngelempungka penusah sereta nulung urang ti seranta.

Kelimpah ari nya mega Nabi Muhammad s.a.w nagang kitai ngemantaika penyai urang bukai, laban ba *akhirat* ila Allah s.w.t ngelalaika penyai sida mega.

Ba senentang nyadi ketuai, Nabi Muhammad s.a.w iya ti bendar siku ari ketuai ti ngembuan ulah pemadu manah serta landik megai tanggung pengawa. Kelimpah ari nya iya mega dibasaka ulih urang bukai. Lebu mayaya iya nyadi ketuai, iya ngembuan pemanah ulah baka ngemeratka tanggung pengawa, lurus ati, enggau bejaku nyemetak sigi enda kala jauh ari iya. Iya mega landik merambu pengawa sereta berani. Tang taja pia, iya mega mudah ngampunka penyai urang bukai ngagai iya.

Kelimpah ari nya, Nabi Muhammad s.a.w mega selalu mai bala pangan sereta kaban belayan iya berandau. Mendingka sebana sida sereta negika jaku ti bendar. Sekumbang iya nyadi ketuai, Nabi Muhammad s.a.w sanggup nabi pemerinsa enggau bala pangan iya. Tang, Nabi Muhammad s.a.w enda' kala minta diberi basa enggau puji laban iya semina ngarapka pengerindu (*redha*) ari Allah s.w.t.

05_

NABI SERETA RASUL : NABI ULUL AZMI



Leka jaku Nabi tauka “Rasul” ba jaku Iban reti ianya “pema’i’ berita”. Lalu reti ia ba genteran jaku ianya “siku laki ti diberi *wahyu* ngagai iya empu tang iya enda diperintahka madahka *wahyu* nya ngagai urang bukai”. Lalu Rasul ba leka jaku reti ia “urang ti dianjung” tauka “pegari”. Lalu ba genteran jaku reti ianya “siku laki ti’ dipilih Allah lalu diberi *wahyu* ngagai iya empu lalu iya diperintahka madahka *wahyu* nya ngagai orang bukai”.

Nyadi tiap iku Rasul ianya Nabi, tang ukai semua Nabi nyadi Rasul. Lalu dalam Islam kitai sigi *wajib* beiman ngagai semua bala Nabi enggau bala Rasul laban ianya nyadi *Rukun Iman*. *Firman* Allah s.w.t ba surah An-Nisa’ ayat 136:

إِلَّا الَّذِينَ تَابُوا وَأَصْلَحُوا وَاعْتَصَمُوا بِاللَّهِ وَأَخْلَصُوا دِينَهُمْ
 لِلَّهِ فَأُولَٰئِكَ مَعَ الْمُؤْمِنِينَ وَسَوْفَ يُؤْتِي اللَّهُ
 الْمُؤْمِنِينَ أَجْرًا عَظِيمًا ﴿١٤٦﴾

Reti ia: “O bala urang ti beiman! Tetap meh kita beiman ngagai Allah enggau Rasul Iya, lalu ngagai Kitab Al-Quran ti udah diberi ngagai Rasul Iya (Muhammad s.a.w.), lalu mega ngagai Kitab-Kitab Tuchi ti udah dianjung dulu agi. Lalu sapa urang ti ingkar ngagai Allah enggau bala Melikat Iya, Kitab-Kitab Iya, sereta bala Rasul pia mega enggau Hari *Akhirat*, nyadi iaka bendar, iya udah tesat ti kelalu jauh.”

Lalu senentang pemayuh bala Nabi enggau Rasul enda ulih ditentuka enggau bendar. Tang ari Qaul ti kering madahka bala Nabi bisi dalam 124,000 iku lalu bisi 313 urang ti nyadi Rasul. Lalu kitai semina wajib nemu 25 iku aja laban nama sida iya bisi disebut dalam Al-Quran.

Lalu 25 iku Rasul nya ianya baka tu:

(1) Adam a.s. (2) Idris a.s. (3) Nuh a.s. (4) Hud a.s. (5) Saleh a.s. (6) Ibrahim a.s. (7) Luth a.s. (8) Ismail a.s (9) Ishak a.s.. (10) Ya'qub a.s. (11) Yusuf a.s. (12) Ayyub a.s (13) Syuaib a.s. (14) Musa a.s. (15) Harun a.s. (16) Zulkifli a.s (17) Daud a.s (18) Sulaiman a.s. (19) Ilyas a.s (20) Ilyasa' a.s. (21) Yunus a.s (22) Zakaria a.s (23) Yahya a.s. (24) Isa a.s. (25) Muhammad s.a.w.

Lalu ari 25 iku Rasul sereta Nabi nya semina 5 iku Nabi ti bepangkat Ulul Azmi. Sida tu ianya:

1) Nuh a.s. 2) Ibrahim a.s. 3) Musa a.s. 4) Isa a.s. enggau, 5) Muhammad s.a.w.

Lalu pangkat *Ulul Azmi* tu reti ia Nabi ti bisi ngembuan pengering ati sereta chukup tan ati lebuah bejalaika pengawa nirika agama Allah s.w.t. Lalu pia mega sida iya sigi diperinsa sereta bulih pemedis ari balas bala urang ti nerima ajar sereta jaku tangkan ari sida iya. Taja pan baka nya sida semampai sabar lalu semampai betawakal enggau tegap ati ngagai Allah s.w.t lebuah mai jaku lalau ngagai bala umat sida iya.

Lalu pangkat Ulul Azmi tu reti ia Nabi ti bisi ngembuan pengering ati sereta chukup tan ati lebuah bejalaika pengawa nirika agama Allah s.w.t. Lalu pia mega sida iya sigi diperinsa sereta bulih pemedis ari balas bala urang ti nerima ajar sereta jaku tangkan ari sida iya. Taja pan baka nya sida semampai sabar lalu semampai betawakal enggau tegap ati ngagai Allah s.w.t lebuah mai jaku lalau ngagai bala umat sida iya.

Nabi Ulul Azmi ka-1: Nabi Nuh a.s.

Lalu Nabi keterubah ia, ianya Nabi Nuh a.s. Nabi Nuh a.s. tu ianya Nabi keterubah ia ti diangkat nyadi Nabi sereta Rasul udah Nabi Adam a.s. dianjung ka dunya. Nama iya; Nuh bin Lamik ari purih Nabi Idris a.s., ianya purih Nabi Syits bin Adam a.s. Iya dikira idup ari taun 3993-3043 SM lalu diangkat nyadi Nabi ba taun 3650 SM. Dipelabaka iya diau ba menua ti dikumbai saritu Negara Iraq. Lalu sida *ahli sejarah* mayuh nyebut iya mati ba Mekah, lalu bisi 4 iku anak laki. Pia mega nama Nuh a.s. bisi disebut 43 kali dalam Al-Qur'an.

Nabi Nuh a.s. bulih pangkat *Ulul Azmi* laban iya bisi ngembuan penyabar ti chukup tinggi. Iya Rasul ti keterubah ia dianjung Allah s.w.t ngeluruska *akidah* sereta pendiau umat iya ti udah jauh bendar nyimpang ari jalai ti bendar. Iya bebendar amat *bedakwah* ngagai bala raban bansa iya taja pan bulih balas jaku ti jai sereta perinsa' ari sida' iya. Allah s.w.t befirman ba Al-Quran, surah Al-A'raf, ayat 60-62:

قَالَ الْمَلَأُ مِنْ قَوْمِهِ إِنَّا لَنَرُّكَ فِي ضَلَالٍ مُّبِينٍ ﴿٦٠﴾

قَالَ يَنْقُومَ لَيْسَ بِي ضَالَةٌ وَأَنْتَ رَسُولٌ مِّن رَّبِّ الْعَالَمِينَ ﴿٦١﴾

Reti ia: “Bala tuai ari raban iya bejaku: “Iaka bendar, kami meda nuan tu (O Nuh) sigi tesat amai. Nuh nyaut: “O bala raban aku, nadai mimit pan utai ti tesat ba aku, tang aku tu urang ti dianjung ulih Tuhan ti ngempu semua *alam*. Aku madahka ngagai kita amanah ari Tuhan aku lalu aku meri jaku lalau ngagai kita lalu aku nemu utai ari (*wahyu*) Allah s.w.t semua utai ti enda ditemu kita.”

Lalu umur iya manggai ba 1000 taun tang bala iya ti nitihka ajar iya enda lebih ari 200 iku. Pia mega bini iya sereta anak iya empu ti benama Kan’an pan enda nitihka ajar iya. Lalu enggau pengeka Allah s.w.t, semua umat Nabi Nuh a.s. ti enggai nitihka jalai lurus iya ambis ditenggelamka dalam ai bah ti chukup balat. Lalu semina Nabi Nuh a.s. sereta bala iya ti nitihka ajar iya, sereta beiman aja ti mujur sereta selamat ari bah nya. Firman Allah s.w.t dalam al-Quran, surah Al-A’raf, ayat 64:

فَكَذَّبُوهُ فَأَنْجَيْنَاهُ وَالَّذِينَ مَعَهُ فِي الْفُلْكِ وَأَغْرَقْنَا الَّذِينَ كَذَّبُوا
بِعَايَاتِنَا إِنَّهُمْ كَانُوا قَوْمًا عَمِينَ ﴿٦٤﴾

Reti ia: “Lalu sida iya ingkar ngagai iya (Nuh a.s.), lalu Kami nyelamatkan iya enggau bala ti begulai enggau iya dalam siti kapal, lalu Kami nenggelamka bala urang ti ngemulaka ayat-ayat kami. Iaka bendar sida iya sigi raban bansa ti buta (mata ati sida iya ari meda pemendar).”

Nyadi Nabi Nuh a.s. tu iya meh Nabi sereta Rasul ti diangkat nyadi *Ulul Azmi* ti keterubah ia.

Nabi Ulul Azmi ka-2: Nabi Ibrahim a.s.

Nabi *Ulul Azmi* ka-2 ianya Nabi Ibrahim a.s. Nama iya ianya Ibrahim bin Azar bin Nahur, ari purih Sam bin Nuh. Iya dipelabaka idup ari taun 1997-1822 SM, lalu diangkat nyadi Nabi ba taun 1900 SM. Iya mega diau ba menua Iraq. Lalu iya mati ba Hebron, Palestina. Nama iya bisi disebut 69 kali ba Al-Quran. *Firman* Allah s.w.t ba surah Al-Anbiya', ayat 51:

﴿وَلَقَدْ آتَيْنَا إِبْرَاهِيمَ رُشْدَهُ مِن قَبْلُ وَكُنَّا بِهِ عَالِمِينَ﴾

Reti ia: "Iaka bendar Kami udah meri ngagai Ibrahim sebedau nya jalai ti bendar ba *tauhid*, lalu Kami mega nemu pendiau iya."

Nabi Ibrahim bulih gelar nyadi Nabi *Ulul Azmi* ketegal penyabar iya ti tinggi lebu diuji. Lebu iya agi mit maya baru ada iya kala belalai dalam gua ketegal Raja Namrud ti deka munuh tiap iku anak laki mit iaka baru ada. Lalu udah iya besai dia iya, bebendar amat *bedakwah* ngagai Raja sereta bala raban mensia ti nyembah antu engkeramba. Pia mega apai indai iya urang ti ngaga patung engkeramba kena dijual. *Firman* Allah s.w.t ba Al-Quran, surah Al-An'am, ayat 74:

Reti ia: “Lalu ingat meh lebuch Ibrahim bejaku ngagai apai iya Azar: “Patutka nuan ngambi antu engkeramba nyadika Tuhan. Iaka bendar, aku meda nuan enggau raban nuan dalam jalai ti amat tesat.”

﴿وَإِذْ قَالَ إِبْرَاهِيمُ لِأَبِيهِ عَازَرَ أَتَتَّخِذُ أَصْنَامًا ءَالِهَةً إِنِّي أَرَىٰ أَرْسَكَ وَقَوْمَكَ

فِي ضَلَالٍ مُّبِينٍ ﴿٧٤﴾

Iya mega diperinsa baka ditunu idup-idup enggau api ti mau lalu diburu ari menua iya empu. Lalu Nabi Ibrahim mega kala diuji lebuch maya iya dipejal nyalam madahka ngagai siku Raja ti kelalu *zalim*, ianya bini iya Sarah, diambu menyadi iya setegal Raja ti bisi ati deka ka iya. Tang Allah s.w.t nyaga sereta nyelamatkan Sarah, lalu nyau ka pengujung Raja nya pan mulaika Sarah ngagai Nabi Ibrahim a.s.

Enda chukup enggau penguji ti berat nya, udah iya jadi enggau bini iya Sarah, 100 taun, seduai iya enda bulih anak. Lalu udah Sarah ngasuh iya jadi enggau ulun iya iaka bekulit chelum Siti Hajar, baru iya bulih anak lelaki ti diberi nama Ismail.

Pia mega Allah merintahka Ibrahim ngelengkaka bini iya Hajar enggau Ismail ti agi mit ba menua pandang pasir ba Mekah. Tang Ibrahim tetap mega ngerejaka perintah Allah s.w.t enggau iman ti tegap. *Firman* Allah s.w.t ba Al-Quran, surah Ibrahim, ayat 37:

رَبَّنَا إِنِّي أَسْكَنْتُ مِنْ ذُرِّيَّتِي بُوَادٍ غَيْرِ ذِي زَرْعٍ عِنْدَ بَيْتِكَ الْمُحَرَّمِ

رَبَّنَا لِيُقِيمُوا الصَّلَاةَ فَاجْعَلْ أَفْئِدَةً مِنَ النَّاسِ تَهْوِي إِلَيْهِمْ وَارْزُقْهُمْ مِنْ

الثَّمَرَاتِ لَعَلَّهُمْ يَشْكُرُونَ ﴿٣٧﴾

Reti ia: "O Tuhan kami, iaka bendar aku udah ngelengkaka sekeda ari bala purih aku ba emperan ti nadai bisi utai ditanam iaka damping ari rumah nuan Baitullah ti dimuliaka. O Tuhan kami ngambika sida iya nirika solat lalu jadika meh ati sekeda ari bala mensia rindu ngagai sida iya lalu beri meh ngagai sida iya mayuh macham buah enggau asil utai ditanam ngambika sida iya besyukur."

Udah nya mega Allah s.w.t nguji agi Nabi Ibrahim a.s enggau penguji ti pemadu tusah ianya nyembelih anak iya Ismail ti benung ngangkatka diri bujang. Lalu tu mega dikerejaka iya lalu Allah s.w.t nganti sembelih iya nya enggau kambin *kibasy*. Lalu nya meh alai *umat* Nabi Muhammad s.a.w sari tu ngerejaka *ibadah* nyembelih Qurban lebuH Hari Raya Haji kena ngenang penguji ti diberi Allah s.w.t ngagai Ibrahim a.s.

Nabi Ibrahim mega urangka terubah ia nirika Kaabah ti dikumbai kitai Baitullah. Lalu Baitullah tu meh ti nyadi endur kitai urang Islam ngerejaka *ibadah* Haji tauka Umrah. *Firman* Allah s.w.t ba surah Ali Imran, ayat 97:

فِيهِ آيَاتٌ بَيِّنَاتٌ مِّمَّا مَكَرَ الْكٰفِرِيْنَ ۗ وَمَنْ دَخَلَهُ كَانَ آمِنًا ۗ وَلِلّٰهِ عَلَى النَّاسِ
حِجُّ الْبَيْتِ مَنِ اسْتَطَاعَ اِلَيْهِ سَبِيْلًا ۗ وَمَنْ كَفَرَ فَاِنَّ اللّٰهَ غَنِيٌّ عَنِ الْعٰلَمِيْنَ



Reti ia: "Iaka bendar dia bisi kelai ti terang (ti mandangka mulia ianya) Makam Nabi Ibrahim; lalu sapa ti tama ke dalam ia sigi selamat meh iya, lalu Allah merintahka mensia ngerejaka Haji enggau chara datai nemuai ke Baitullah ianya bagi sapa bala urang ti sanggup datai kia. Lalu sapa urang ti ingkar (ari ukum *wajib* Haji), nyadi iaka bendar Allah Pemadu Kaya (enda begunaka siti pan) utai ari semua *makhluk*."

Nabi Ibrahim ukai semina Nabi ti mayuh diuji Allah s.w.t tang siku ari Nabi ti digelar 'Khalilullah' ianya Sulu Allah. Nya alai Nabi Ibrahim a.s. siku ari Nabi ti sigi selalu disebut kitai dalam solat, ianya lebu mayu duduk *tahiyat*. Dia kitai bisi beselawat ukai semina ngagai Nabi Muhammad s.a.w, tang pia mega ngagai Nabi Ibrahim a.s. Lalu endang patut bendar iya bulih gelar *Ulul Azmi*. *Firman* Allah s.w.t ba Al-Quran, surah Al-Ankabut, ayat 27:

وَوَهَبْنَا لَهُ إِسْحَاقَ وَيَعْقُوبَ وَجَعَلْنَا فِي ذُرِّيَّتِهِ النُّبُوَّةَ وَالْكِتَابَ
وَعَاقِبَتُنَّهُ أَجْرَهُ فِي الدُّنْيَا وَإِنَّهُ فِي الْآخِرَةِ لَمِنَ الصَّالِحِينَ ﴿٢٧﴾

Reti ianya: "Lalu Kami beri ngagai iya (Ibrahim); Ishak (anak iya) enggau Ya'qub (uchu iya), lalu Kami nyadika ari purih iya urang ti bepangkat Nabi sereta nerima Kitab, lalu Kami meri balas ia ti manah ba dunya; lalu iaka bendar, iya ba Hari *Akhirat* ila sigi amai ari sepiak urang ti *soleh*."

Nyadika pengujung ia, arapka penerang tu ulih meri mimit penemu ngagai bala pemacha.

06_

ADAT BEKALING, BEKABAN TAUKA BESULU BA DALAM ISLAM



Umat islam di negeri perlu mengelak perpecahan sebaliknya perlu terus bersatu dan mengukuhkan perpaduan.

Yang Berhormat Datuk Dr. Haji Abdul Rahman Bin Haji Junaidi

Menteri Muda di Jabatan Ketua Menteri (Hal Ehwal Agama & DBKU) dan
Menteri Muda Utiliti Sarawak (Bekalan Air)

Sigi nyadi adat kitai raban mensia ti rindu bekaling enggau urang bukai ti segulai sejalai enggau kitai seari-ari. Kitai ka bekaling tu kebuah deka begulai sekalika ari sama tauka dampih endur diau, betemu ba sekula, kolej, Universiti tauka ba pengrami mensia mayuh sereta mayuh bengkah pengawa ti bukai. Lalu, Islam sigi ngasuh kitai bekaling manah enggau urang bukai. Kitai mesti adil enggau kaling kitai lalu kitai mesti deka meri sida iya nama aja utai ti dikedekaka ngagai kitai empu. Nabi Muhammad s.aw besabda ti reti iya;

“urang ti taluk sigi nyadi cermin ngagai menyadi iya. Iya sigi nyeliahka iya ari barang aja penusah.”

Urang ti bekaling suah bedoaka pemujur sereta pengerai kaling iya, iya mega sinu enti meda kaling iya ditinggang penusah tauka pemerinsa. Nya alai urang ti bekaling besaup naka ka ulih, ngambika kaling iya ulih gerai tauka mujur dalam penusah tauka pemerinsa iya. Sida iya mega ngelalaika rahsia kaling iya.

Pemanah kaul dalam bekaling tu sigi nyadi utai ti pinta dalam idup *besosial*. Nabi Muhammad s.a.w besabda ti reti iya:

“Siku urang nya nitih ka jalai sereta ulah bala kaling iya”.

Enti milih sapa ka nyadi kaling, kitai mesti nimbang enggau manah enti bisi guna tauka penguntung bekaling enggau iya. Iya mesti mikirka pendiau sereta ulah ti dikembuan iya. Nabi Muhammad s.a.w besabda ti reti iya;

“Tiap ikuk Muslim mesti milih sapa-sapa ti nyadi kaling iya sepemanjai pengidup iya. Kaling tu ulih ari ka sebaka *jenis/gender* enggau iya. Enti kaling nya ari *jenis/gender* ti enda sebaka, iya tau nyadi urang ti belaki bebini enggau iya ti idup segulai nitih ka adat enggau atur.”

Rasulullah s.a.w mega ngasuh kitai ngiga/milih urang ti nyadi kaling ti ulih bekungsi enggau kitai dalam pengawa nyangkut ati . Iya besabda ti reti iya;

“Anang ngambi nyadi ka kaling kelimpah ari urang ti beiman; lalu anang meri pemakai nuan diempa kelimpah ari urang ti nitihka ajar Tuhan.”

Pia mega kitai ngambi urang nyadika kaling kebuah diri iya empu ukai ketegal ka bukai. Kitai mega enda tau ka mejal iya setuju enggau semua penemu kitai asal aja semua utai mengkang ba jalai ti dikebendarka Islam. Urang Islam diasuh Nabi s.a.w ngiga urang ka manah ti ulih nyadi kaling lalu bekaling manah dalam pengidup iya. Enggau milih urang ti manah diambika kaling sereta kaban, urang Islam nyadi urang ti untung dalam idup iya. Nabi s.a.w besabda;

“Lalu banding urang ka bisi kaling ka manah baka urang ti ngempu minyak angi; Enti kitai enda bulih minyak angi nya, kitai tetap bulih nyium bau iya. Lalu banding urang ka bisi kaling ka enda manah baka urang ti begulai enggau urang ti ngambuh duku. Enti enda kena abuk api, kitai sigi kena bau asap iya.”

Islam nadai nagang kitai bekaling enggau urang ti kala ngerejaka penyalah tauka dosa sereta salah ba undang-undang, tang enggau juluk ati deka nulong iya metulka penyalah tauka dosa iya. Urang ka bekaling sigi rindu ka kaling sida iya empu. Iya bisi penyinu ka kaling iya sereta rindu ngeyamaika ati kaling iya ti ransing. Kaling ti manah sigi sama bela ngasuh pangan diri udu agi bepegai enggau idup ti ngembuan agama. Sereta ngerejaka pengawa ti manah. Nabi s.a.w besabda ti reti iya:

“Takut meh ka Allah lalu saup meh sama bela kita kebuah Allah s.w.t. Kasih meh ngagai kita sama diri. Nemuai meh ngagai sama diri sereta ingat meh pekara kitai lalu idupka meh.”

Sari tu, ba dunya enti enda bedulika urang bukai sereta semina berati ka diri empu aja, nadai mayuh urang ti nyaga kaling sida iya. Nya alai, kitai mesti milih kaling kitai enggau bejimat, lalu berati ka ulah sida iya enti deka' dampih bekaling enggau sida iya. Arapka Allah s.w.t nunjukka kitai jalai.

07_

NGAJAR ANAK CHARA ISLAM



33 Anak-anak merupakan bakal pewaris jentera kepimpinan negara kita pada suatu masa kelak. Justeru, dengan adanya persediaan pendidikan yang berteras agama kepada golongan (anak-anak) ini, sekaligus mampu melahirkan anak-anak yang membesar dengan pendidikan agama yang lengkap serta sentiasa berada di laluan yang betul.

Datu Haji Misnu bin Haji Taha
Yang Dipertua Majlis Islam Sarawak

Suah bendar kitai ninga sereta meda anak mit ti manchal ulah bisi sekeda urang nya bejaku munyi tu: “nyaa... apai indai enda ngajar meh nya. Nama ka nyadi ngagai nemiak tu ila enti udah besai nyadi urang jai meh”, sigi kasar meh bunyi didinga pending kitai ka ninga.

Baka ni enti sema nemiak nya anak kitai empu? Mesti kitai berasai nesal ati. Ukai kitai enda ngajar anak kitai, tang anak mit nya mudah dirampit kaban sida maya begulai ba luar rumah. Nama salah enti kitai datai semak enggau anak mit nya lalu meri jaku ajar ti manah sereta siru.

Aram kitai sama meratika chara ngajar anak nemiak ngambika bisi nyadi lalau kitai apai indai.

Keterubah ia, seliahka malu anak ba pala patung ke atas. Anang sekali-kali kitai apai indai malu anak ari pala patung nyentukka atas. Enti kelalu ringgat palu meh ba tapak kaki anak nya.

Kedua, anang jampat datai jari lebu ngajar anak kitai. Anang nginsah tauka nyamah sida iya enggau penapat inat. Kelebih agi anang nampar anak ngena jari ti ulih ngasuh iya berabi tauka telih. Utai tu ngasuh enda manah sereta nambahka ulah nemiak makin manchal sereta enda mendingka jaku ajar.

Ketiga, ajar meh anak kitai *solat*. Tau ngembat rutan tauka malu anak ba tapa kaki tang ukai malu kuat enggau ukai nitihka pemedis ati ti ringat. Enti ari *saintifik* bisi bekait enggau *refleksologi* enggau meri peransang ngagai untak.

Keempat, ianya beri nama ka manah ngagai anak kitai. Anang nganggauka anak kitai enggau kangau ti enda manah laban tau ngasuh sida berasai malu. Ba ajar pengarap Islam kitai diasuh meri nama kangau ti manah ngagai anak kitai.

Kelima, bala apai indai semampai kerap anak kitai tiap hari. Anak mit ka selalu diberap enggau disayau deka ngembuan pemintar runding ti lebih dibandingka enggau anak mit ka jarang diberap.

Keenam, apai indai mesti deka merening anak enggau perening ka siru enggau naka penyayau ka sida ia. Laban ari perening kitai apai indai ngasuh bala anak kitai lebih pecayak enggau diri empu maya betunga enggau semua utai.

Ketujuh, beri meh peneguh tiap kali sida anak ngaga utai ka manah. Beri jaku puji, berap, sium enggau perais tauka enti enda pan tuchum ngagai sida maya meda sida ngaga utai ti manah sereta badas ulah.

Kelapan, anang kelalu ngarapka anak kitai ka bedau umbas umurnya ngaga semua utai ka manah magang enggau semampai nadai ngaga penyalah laban sida semina anak mit ti benung besai enggau mayuh agi utai deka ditengah sereta ditemu sida.

Anang sekali-kali kitai apai indai sebana ka bala anak kitai ba mua sida laban utainya semina ngasuh sida ngasai ka diri sida ngeribat ka kitai apai indai.

Kesembilan, dingaka meh cherita bala anak kitai laban cherita ari sida enda ulih kitai dinga agi maya hari ka jemah ila enti sida udah besai. Nganti gintir kitai maya deka' bejaku awakka kena ngajar anak reti sereta bebasaka urang ti benung bejaku.

Kesepuluh, beri ka awak begulai enggau anak kitai ba luar rumah. Pegai jari sida maya bejalai enggau sida awak ka sida ngasai ka diri sida dikemeratka kitai apai indai.

Kepengujung sekali, anang nejuka anak kitai tinduk enda disium dulu meri selamat malam ngagai sida. Sebedau nya bai anak kitai macha doa enggau surah ka disunnah ngagai kitai sebedau tinduk ianya *al-Fatihah, ayatul Kursi, surah al-Ikhlash, surah al-Falaq enggau surah al-Nas serta doa enggau syahadah.*

Nya meh chara ngajar anak mit. Bala anak kitai baka kain burak. Apai indai meh ti ngenchura ka sida iya. Arap ka kitai semua sama bela nyadi apai indai ke mentas ngagai anak kitai mega. Ngajar anak kitai nitihka chara ti patut dalam Islam.

08_

PENGELEBIH INDAI



Bisi Hadis ari Abu Hurairah madah: Siku laki bujang datai ngusung Rasullulah s.a.w lalu nanya: " Siapa mensia ka bendar patut dipebasa aku enggau chara ti pepadu mentas? "Nabi lalu nyaut : "Indai nuan" Laki nya nanya baru : "Siapa agi udah nya? Nabi nyaut : "Indai nuan" Lalu laki nya nanya baru : " Udah nya siapa agi? "Nabi nyaut : "Indai nuan" Lalu laki nya nanya baru : " Siapa agi ?" Nabi nyaut : "Apai nuan." (Riwayat Bukhari enggau Muslim).

Ba siti *Hadis* bukai, Riwayat Muawiyah bin Jahimah al-Sulaimi, siku pangan Rasulullah. Jahimah al-Sulami r.a bisi datai betemu enggau iya minta runding sekali ka iya ulih enggau urang beperang. Rasulullah lalu nanya iya: " Nuan agi bisi indai ?" Jahimah lalu nyaut: "auk" Lalu Rasulullah madah: "Diau enggau iya meh laban serga nuan ba baruh tapak kaki iya". (Riwayat Imam Al Nasa'i).

Ba antara apai enggau indai, indai meh ti lebih ka agi patut diberi basaka besai ari anak. Ukai semina nya aja, tang indai ngembuan tiga kali lipat pemesai ungkup dipebasaka ari siku apai baka ti disebutka ba hadis tadi.

Semua tu madahka pemesai enggau pemulia indai ba tisi Allah s.w.t lebu ngadaka anak enggau nguan iya nyentukka besai.

Imam Al-Qurthubi nerangka hadis tu madahka pengerindu sereta penyayau ka siku indai mesti tiga kali lipat lebih besai agi enti dibandingka enggau siku apai. Nabi Muhammad nyebut jaku indai nyentuk tiga kali, tang jaku apai semina sekali laban pemedis maya ngandung, penusah maya nusu enggau ngintu anak semina diasai ulih siku indai.

Peda meh peninggi basa indai ba pengarap Islam. Pementas siku indai enda ulih dibalas budi iya enggau reta tengkira. Siku laki datai ngusung Sayyidina Umar Al-Khattab, lalu madah ka iya "Aku udah ngema indai aku sepemanjai *Tawaf* enggau *Haji*, udah ka aku ulih malas pemanah indai? " Lalu Umar nyaut " Nuan bedau ulih malas pemanah indai nuan taja pan setitik ai mata indai nuan maya iya beranakka nuan."

Taja pan siku indu nya udah belaki, Islam ngemeratka *silaturahmi* anak enggau indai mesti terus baka selama. Islam mega ngajar laki bela adil enggau bini iya. Enti bini deka nulung apai indai iya ti tusah enggau minta bantu. Jaga meh ati indai kitai, semampai rindu, kasih serta sayau ka sida sereta bebasa enggau selalu bejaku manah. Anang sekali kitai ngemesai ka nyawa ngagai indai tauka apai. Enti bisi chukup penatai pemisi ari duit ringgit, bala anak mega mesti nyediaka indai pemakai ti chukup enggau semampai nulung ngelempungka penusah sereta penanggul seduai iya.

Nya meh kebuah bala anak selalu diingatka semampai bedoa ka apai indai taja pan sida udah nadai agi. Kitai minta ngagai Allah s.w.t awakka Iya ngampunka semua dusa indai. Baka nya mega, siku anak mesti ngabas kubur indai iya, nyedekahka macha *Al-Fatihah* enggau *Surah Yasin* ngambikka sida lantang ba *akhirat*. Pemanah indai nya meh besai amat reti sereta enda ulih diganti enggau reta tengkira. Pemayuh ni pan sekali reta tengkira kitai enda meh ulih kena mayar pemanah enggau pementas indai kitai. Asuh meh indai kitai senang ati, gaga, rindang enggau tuchum belama lebuah agi begulai enggau kitai.

09_

UNGKUP NEMBIAK MIT DALAM ISLAM



Islam sigi amat ngambi berat senentang pelajar nemiak mit enggau meri ungkup ti patut ia ngagai sida. Islam udah meri garis jalai ti patut dititih enggau chara ngajar nemiak mit ari sida agi dalam kandung indai sida nitihka ari pun. Islam sigi ngasuh bala muslim iya, enti deka milih laki tauka bini mesti milih siku indu tauka lelaki ti ngembuan pengidup ti manah sereta mentas.

Keterubah ia, kena ngingatka kitai ka nyadi apai enggau indai. Nemiak mit begunaka penyiru enggau kasih sayau.

Anak mit begunaka penyayau enggau pengasih ari apai indai, baka chunto anak mit begunaka pemakai enggau utai irup. Kasih sayau ngagai anak nya siti ari pengajar ka terubah patut ia diberi ulih apai indai ngagai anak mit. Anak mit ti dibesaika enggau penyiru sereta kasih sayau ngembuan runding enggau pikir ti *kreatif* sereta badas. Kelimpah ari nya, anak mit nya mega ngembuan pengelandik sereta pingingat ti kering enggau ulah ti manah.

Kitai sama bela nemu ungkup anak mit ke sepengudah iya diadaka ba dunya bisi ungkup iya empu.

Keterubah ia, diazan enggau *iqamat* ba pending sepiak kanan maia anak mit nya sepengudah iya diadaka aba dunya. Entara resia enggau hikmah *azan* nya awak ka jaku ti terubah di dinga anak mit nya *kalimat tauhid*, jaku ti ngemesaika Allah s.w.t, *kalimah syahadah* ti mai *solat* (sembiang) enggau nuju pemujur sereta pemansang dalam pengidup.

Anak mit ti baru ada digagaka *Tahnik* lalu dichukur buk enggau *Akikah*. *Tahnik* anak mit baru ada nya reti ia ngusu lelanggit anak mit nya enggau mimit aja isi buah kurma ti udah dipirit tauka udah dikunyah diasuh lemik. *Disunatka* maya ngaga nya bersampi ngagai Allah s.w.t awakka pengidup anak nya semampai diberekat. Urang ti ngaga *tahnik* nya mesti iya urang ka manah pengidup enggau taluk ati ngagai perintah Allah s.w.t sereta nitihka jalai pengidup dalam Islam.

Nyukur buk anak mit baru ada digaga sebedau *akikah* enggau sepemanah ia digaga hari ketujuh udah iya ada ba dunya. Pengawa tu nunjukka lambang ibadat enggau tanda *syukur* ngagai Allah s.w.t. *Akikah* ianya pengawa pengerami makai selamat ngena chara nyemelih jelu tupi sepengudah anak mit nya ada. Enti anak mit lelaki ngena dua iku kambin. Enti sema anak nya indu, *akikah* iya siku kambin aja.

Apai indai betanggung pengawa meri nama ti manah reti ngagai anak sida. Pesan jaku ari Rasulullah s.a.wti mai reti "Antara ungkup anak ti mesti dikerejaka apai iya bisi tiga bengkah. Keterubah ia meri nama sepengudah iya ada, ngajar al-Quran maya iya udah nemu reti sereta nikahka iya enti udah chukup umur tauka udah *akil baligh*.

Bejaku kitai pasal meri penemu pemandai ngagai anak mit, kitai sama bela nemu, tiap apai indai sigi betanggung pengawa ngajar bala anak enggau penemu agama awakka bala anak nya nyadi anak ti mentas. Apai indai mesti nyaga anak mit nya ari utai ke tau ngerusak ka sida iya ari runding enggau batang tubuh. Semampai ngajar agama ngagai bala nemiak mit tu, mesti dikemeranka amat ngambi ka sida ngembuan *sahsiah* tau'ka ulah pendiau ti manah.

Nyadi apai indai betanggung pengawa ngajar sereta meri peransang enggau penemu ti manah ngagai bala anak datai ka sida bulih pemujur. Apai indai mesti ngemansangka bala anak begigaka penemu baka chunto; macha bup, media rama, enggau sayauka penemu sereta pemandai. Penemu pemandai tu nyengkaum semua penemu ka manah ti mai pengelikon ngagai sida maya nengah jalai pengidup ti mayuh penanggul. Kelebih agi ba maya tu, penemu *multimedia*, *sains* enggau *teknologi* mesti deka ditemu sida iya kena napi penanggul maya ti deka datai. Nadai penemu, pengidup bala anak napi pemar dudi hari jemah ila.

Tanggung pengawa mensia mayuh ka patut dikerejaka kena ngajar nemiak mit awakka ulih enchura sida jemah ila awakka enda dibalut pemetang. Sida meh reta ti pengabis berguna

nyadi ka tulang belakang dudi hari jemah ila. Pengerusak sereta penuntung pengidup ti nyadi baka kes nginsah anak mit, lari ari rumah, nemiak indu umur belas taun udah bejualka tubuh diri (*nyundal*), nemiak mit nyadi kuli enggau bala anemiak ke baru angkat bujang dara beleman enda beradat (*seks bebas*) patut diseliahka kitai ari ti nyadi. Nya meh tanggung pengawa bala kitai mensia mayuh, enggau chara besaum pengawa antara *badan-badan sukarelawan, badan-badan dakwah, pertubuhan-pertubuhan NGO* (Gerempung ukai perintah) enggau bala pemerintah empu kena nyeliahka penusah.

Keterubah ia, kena nyeliahka utai ka baka tu kitai mesti ka meri penemu ngagai apai indai ngemberatka ajar agama ba ruang bilik diri empu ngena pemanah ulah enggau penemu serta runding ke mentas.

Kedua ia, Gerempung dakwah enggau *sukarelawan*, Gerempung ukai perintah (NGO) tauka pertubuhan ukai perintah mesti ka ngemansang serta ngemesaika agik pengawa enggau bala sida nemiak kena meri atur pengidup sida jemah ila. Penemu nya meh nyadika tiang pemun menyana ti patut dirika ari mit.

Mensia mayuh mesti besaum pengawa antara diri empu kena ngatur sereta nyura pendiau pengidup ti *harmoni*, kasih sayau enggau sama bela berakup dalam gerempung serta betulung ngemansangka nemiak ungkup ka pengidup dudi hari ila.

10_

NEMUAI NGAGAI PANGAN DIRI



Ba pengarap Islam nemuai ngagai pangan diri tu sigi dikemeranka. Enggau pengawa nemuai tu, kitai ulih ngeringka agi tali *silaturrahim* antara pangan diri.

Tang taja pia, sebedau ka nemuai ngagai bala pangan diri, bisi enam bengkah adat basa iaka patut ditemu kitai. Taja pia, adat basa maya nemuai tu baka ka suah didinga, tang taja pia tusah amatka dititih.

Basa ka lumur satu ianya : Meri *salam* ngagai urang empu rumah. Lebu mayu nemuai ka rumah pangan diri, kelebihan agi iaka sama bela muslim, kitai mesti meri salam. Laban, meri *salam* tu nunjukka diri kitai bebasa enggau urang bukai. Tang taja pia, pengawa meri *salam* tau ka betabi basa tu ia ti bendar nyengkaum semua bansa.

Pengawa beberi salam tu ukai semina madahka penatai diri, tang ari pengawa meri salam tu mega kebendar ia medoaka urang ti empu rumah nya tadi. Taja pia Nabi Muhammad s.a.w bisi meri pesan ngagai kitai senentang pengawa meri salam tu. Pesan iya, enti beberi salam ngagai urang empu rumah ka digusung nya tadi, chukup meh naka tiga kali aja.

Basa lumur dua ianya: Pilih meh maya tau ka hari iya ti ngena enti ka nemuai. Ngambik ka chunto ia, enda kelalu tumu pagi, engka urang bedau dani tinduk, tau ka agi kiruh ngaduka ruang bilik iya. Anang mega kelalu laun, tau ka jauh malam, nangika kitai ngachau iya ka belelak, enti sema iya kereja sepemanjai hari. Tingkah ari nya anang mega duduk kelalu lama, nyentukka urang empu rumah, nyau kiruh ngintu penatai kitai, engka iya bisi pengawa bukai ti deka dikereja.

Basa ka lumur tiga, ianya enti lebu mayu nemuai, sigi selalu enti kitai bejaku tau ka betusui mayuh macham utai. Tang patut kitai ingat, lebu mayu bejaku kitai mesti nyaga dilah. Anang bejaku renjan, nyindir sama bela diri, begedi tau ka bejai pangan diri, enggaika ngemedis ati urang ti ninga ia. Kelimpah ari nya, anang mega kelalu deka berandau tau ka betusika penyai urang bukai. Bejaku tau ka becherita meh senentang utai ti manah-manah aja.

Basa ka lumur empat, ianya enti lebu may nenuai ngagai rumah pangan diri, anang ngambi utai urang iaka ukai ungu kitai. Tu ulih dikumbai enchuri. Taja pan rumah nya tadi, rumah apai indai, menyadi tauka kaban belayan diri empu. Pengawa ngambi utai nadai pemendar nya, sama meh baka ka enchuri.

Enti bisi mai anak mit lebu may nenuai, bala anak patut mega ditangkan tumu agi awakka sida iya mereti sereta enda tau ngambi utai urang sengapa. Enti ka, mesti minta pemendar dulu ari urang ka empu rumah.

Basa ka lumur lima ianya minta pemendar urang empu rumah enti deka pulai. Baka ni basa kitai datai tadi, baka nya meh basa enti kita ka pulai. Anang lalu angkat nyingkang mulaika diri. Ba senentang pengawa tu, Nabi Muhammad s.a.w bisi *besabda* lebih kurang baka tu reti ia, "Maya bisi siku ari bala kita nenuai ngagai bala pangan lalu iya duduk begulai enggau kita, anang sekali-sekali kita pulai nyentukka pangan kita nya tadi meri pemendar." (Hadis riwayat Ad-Dailami).

Penudi ia ka lumur enam, meri terima kasih, ngagai urang ti empu rumah ka udah diusung nya tadi. Laban iya udah nyambut penatai kitai ke rumah iya. Bisi sekeda nya ngenahka utai dipakai enggau sanggup mega bebagi masa iya ngintu kitai, ari ngaga pengawa ti bukai.

Pengawa nenuai tu sigi siti pengawa ti manah. Pengawa nenuai tu mega enda semesti ia maya hari besai aja, baka maya ngintu hari gawai tauka hari raya. Enti sema bisi bala pangan tauka kaban belayan ti sakit, tau mega kitai ngusung ngabas iya. Betanya ka berita, bebacha ka *doa* enggau bebaika pemerikena ngelantangka ati pangan nya tadi. Nyadi, kelimpah ari nya pengawa nenuai tu patut bendar nyadi chunto ka manah ba kitai ka bepengarap Islam.

11_

AIDILFITRI



﴿﴾

Masyarakat islam dan bukan islam di sarawak bersatu padu, saling bekerja sama dalam banyak perkara dan dapat hidup dengan aman.

Datu Haji Misnu bin Haji Taha

Yang Dipertua Majlis Islam Sarawak

Aidilfitri tauka dikumbai mega Hari Raya Aidilfitri ba Malaysia nanda ka pengambis bulan tuchi Ramadhan sereta pun bulan Syawal. Aidilfitri dalam jaku Arab : **الفطر عيد**; Aidilfitri “pengrami *fitriah*” ti reti iya Hari Raya *Fitrah*, pengrami Hari mensia mulaika diri nyadi tuchi ba tisi Allah s.w.t. Lalu mulaika *fitriah* diri retinya kitai mali nyadi mensia ti tuchi sereta manah.

Hari tu mega urang ti *beiman* bulih pinglepas sereta ulih nyepi baru semua limpah rejeki udah sebulan nyerahka ati sida ngagai Allah s.w.t. Ia sigi hari ti gaga laban udah ngerejaka pengawa wajib sereta percaya bulih pahala ti besar ba sisi Allah.

Aidilfitri mega tuchung pemenang mensia dalam perang ba antara akal enggau *nafsu* iya, laban puasa sigi chara mensia ngalahka peneka nafsu iya ti semampai nyimpang ari ajar Islam.

Nyadi udah umat Islam bepuasa sebulan penuh ba bulan Ramadhan ngelaban *nafsu* ari ngerejaka pekara ti ditagang lebuh bepuasa, tentu meh kitai tau mantaika pengaga ati sereta *besyukur* enggau penatai 1 Syawal iya nya ari ka menang ngagai sida ti amai-amai ngerejaka *ibadah* Ramadhan.

Lebu dipadahka udah 1 *Syawal*, dia umat Islam *disunatka* sama bela *betakbir*. *Betakbir* tu iya nya macha puji ngagai Allah sereta ngemesaika iya. Hukum sunat tu terus dataika Imam ngangkatka *takbiratul ihram* nirika sembahyang sunat hari raya. Takbir tu ukai semina disyariatka ngerami hari raya tang kelebih agi kelai kitai ti *besyukur* ngagai Allah s.w.t sereta iya mega pekara ibadah. Kelimpah ari *betakbir* mega siapa ti ngidupka malam *Aidilfitri* deka diberi upah pahala ari Allah s.w.t. Malam *Aidilfitri* iya nya sekeda ari malam ti disunatka diidupka sereta *ditakmirka* laban ba dalam iya bisi maya ti sigi dikebendarka doa iya. Al-Syaikh Qulyubiy ba kitab Hasyiyatan bisi nyebut iya nya:

“...sunat ukum iya ngidupka malam Aidilfitri tu enggau dan malam Aidiladha enggau bezikir, ngerjaka sembahyang kelebih agi sembahyang sunat Tasbih. Tang chukup meh enti ngidupka

malam nya enggau bagi ti besai sereta sekurang-kurang iya enggau ngerejaka sembahyang Isya' berjemaah sereta bisi netapka ati ka ngerejaka sembahyang Subuh" (Kitab Hasyiyata Qalyubiy wa Umairah 1:359)

Lebuh pagi ari Aidilfitri urang laki disunatka mandi ianya beniat kebuah Aidilfitri. Pia mega sunat minyak anggi ti bebau renggut, meresi tubuh enggau beguntin buk sereta mapal kukut. Sunat mega begari ti pemadu manah, tang ti *afdhal* / lebih manah agi ti chura burak serta ngena serban.

Ngagai indu ti bajik sereta bisi bepangkat sida iya *makruh* datai ka masjid. Sebedau angkat ka masjid disunatka makai buah kurma enggau pemayuh ti ganjil baka tiga igi tauka lima igi. Dalam Hadis ti *diriwayatka* Imam Al-Bukhari ari Anas ku iya ti reti iya:

"Ka bendar Rasulullah s.a.w enda pansut (ti deka solat *sunat* Hari Raya) lebuh Hari Raya *Fitrah* sebedau iya makai mimit buah kurma."

Lalu ka penudi iya, nirika *solat sunat* Hari Raya. Nabi sa.w. bisi besabda ti reti iya:

"Iya ka bendar, utai ka terubah dikerejaka kitai sari tu (Hari Raya) ianya solat "(Hadis riwayat Al-Bukhari)

Ari Abu Ayyub r.a: "Rasulullah s.a.w bersabda: 'Sapa ti bepuasa *Ramadhan* lalu nandu iya enggau puasa 6 hari lebuh ba bulan Syawal, nyadi nya meh puasa sepemanjai hidup." [Riwayat Muslim 1984, Ahmad 5/417, Abu Dawud 2433, At-Tirmidzi 1164]

Hukum nya Sunah ti nyadi amal sida Imam Asy-Syafi'i, Ahmad sereta mayuh ulama tebilang bukai. Puasa 6 ati tu dikerejaka udah sari tauka dua ari udah idul fitri ti dikerejaka beturut-turut tauka barang ari dalam bulan Syawal. Iya ukai wajib tang sunat aja. [*Fataawa Al-Lajnah Ad-Daa'imah lil Buhuuts wal Ifta'*, 10/391]

12_

FIQH URANG INDU : ADAN AURAT INDU





urat tu reti iya

Lalu dalam penerang fiqh urang indu ka sekali tu nampung baru ka senentang adan *aurat*. Lalu kitai deka nyaut tanya naka ni adan *aurat* bala sida indu ti ditutup?

Adan *aurat* indu ti ditutup enda sebaka nitihka maia iya ka begulai enggau sida ka laki. Lalu kitai patut beratika empat bengkah maya ti nentuka adan *aurat* iya.

1. *Aurat maya iya enggau laki iya empu.*
2. *Aurat maya ba mua laki ti ajnabi.*
3. *Aurat maya ba mua mahram iya empu.*
4. *Aurat maya ba mua sida indu bukai.*

Ka terubah iya aurat indu' enggau laki iya.

Nadai adan *aurat* ba antara laki enggau bini iya empu. Harus ngagai laki sereta bini meda semua tubuh pangan sida empu.

Ka dua iya aurat iya enggau laki ajnabi / laki bukai ti' ukai laki iya tauka mahram iya.

Aurat indu lebuah enggau sida laki *ajnabi* iya nya semua tubuh iya kelimpah ari mua sereta dua jari iya datai ba gelang jari.

Suah mega kitai ka meda sekeda ari bala indu ti nutup mua sida iya. Kati pengawa nya sigi dikebendarka Islam?

Nyadi, dalam sekeda penemu sida ulama enti bisi indu muslim ka kelalu bajik lalu enti iya ngayanka mua iya, lalu kebuah nya tau nusahka iya laban tau nyadi ka *fitnah* ka laki ti meda iya, lalu *wajib* meh ngagai iya nutup mua iya.

Nyadi udah nya kitai deka nemu sapa meh ti nyadi mahram ngagai indu muslim. Lalu baka ni adan auarat iya leboh betemu enggau mahram iya.

Mahram urang indu iya nya laki ti haram bekawin / nikah enggau iya belama-lama iya kebuah purih pantih, bekawin tauka kebuah nyadi menyadi sama nyusu. Nyadi bala laki tu' nyengkaum;

1. Apai iya empu
2. Apai entua
3. Apai ti bebinika indai ti nyusu ka iya
4. Anak ti diperanakka iya
5. Anak tiri (anak laki iya)
6. Anak ti ditusuka iya
7. Menyadi laki
8. Menyadi laki ti sama nyusu
9. Anak menyadi laki
10. Menyadi laki apai iya

Lalu nitihka *jumhur ulama*, auarat iya leboh ba mua sida laki tu enda diwajibka nutup tubuh iya kelimpah ari tubuh ti ba antara pusat enggau patung.

Adan auarat enggau sama bela indu?

Bisi dua iti penemu;

1. Aurat enggau sama indu Islam.

Aurat iya sebaka enggau auarat iya maya enggau lelaki mahram iya, iya nya antara pusat enggau patung iya.

2. Aurat enggau indu ukai Islam /kafir

Bisi *khilaf* penemu bala *ulama*. Tang nitihka sekeda *ulama* iya nya setengah *ulama mazhab* Maliki enggau Syafie nentuka auarat iya enggau indu *kafir* semua tubuh iya kelimpah ari mua sereta dua jari iya.

13_

FIQH URANG INDU : BEHIJAB NUTUP AURAT



Mayuh urang indu Islam ti bedau meretika senentang pengawa *behijab* nutup *aurat* tauka dikumbai kitai ngena gari ti nutup tubuh sida iya sereta betudung tauka nutup pala enggau gari. Lalu nama utai ti dikumbai *aurat* tu? Lalu nama kebuah Islam ngasuh sida ka indu *behijab* nutup *aurat* sida iya?

Allah befirman dalam Al-Quran Reti iya:

“Padahka meh ngagai sida indu ti beriman: “Asuh meh sida iya nyaga utai dipeda sida iya sereta “*kemaluan*” tauka utai tubuh ti dikelalaika iya, lalu anang meh ngayanka utai ngias sida iya kelimpah ari utai ti sigi tampak ari nya. Lalu mesti meh sida iya nutup tauka ngemanjaika tudung datai ka dada sida iya, lalu anang meh ngayanka utai ngias sida iya kelimpah ari ngagai laki sida empu, tauka apai iya empu, tauka apai laki sida iya empu, anak-anak laki sida empu, tauka anak-anak laki, laki sida iya empu, tauka bala menyadi laki iya empu, tauka anak-anak laki menyadi sida iya empu, tauka anak-anak laki menyadi indu sida iya empu, tauka indu Islam, tauka bala nembiaik ti dipenggi sida iya empu, tauka sida ulun laki ti nadai nafsu ka indu, sereta anak mit ti enda mereti senentang aurat. Lalu anang meh sida iya ngentakka kaki sida iya ngambika urang nemu utai pengias ti enda dipeda. Lalu betaubat meh kita semua ngagai Allah O urang ti *beiman* ngambika kita bulih penguntung.” (Surah an-Nuur, 24: 31)

Dalam siti Hadis riwayat Abu Daud: ari ‘Aisyah, iya nya Asma’ binti Abu Bakar kala betemu enggau Rasulullah s.a.w ngena gari ti nipis. Rasulullah s.a.w pan nging ari malik ka iya lalu besabda,

“O Asma’, iya ka bendar enti indu nya udah datai ba maya datai kain, iya enda patut ngayanka tubuh iya kelimpah ari tu enggau tu. Iya bejaku pia lalu nunjukka mua sereta dua tapa jari iya. Tu meh cara ti pemadu manah ti nyaga sereta nagang ati mensia. Nyadi anang meh sida indu ngayanka tubuh sida iya kelimpah ari mua enggau dua iti tapa jari sida. Allah ti meri *taufiq* sereta nadai Tuhan ti bendar kelimpah ari iya.”

Hijab ari reti leka jaku bahasa iya nya pengawa ti nutup, ngelindung, sereta nagang.

Ari tisi *syara'* (istilah) *behijab* tu reti iya nya siku indu ti nutup tubuh sereta utai ngias iya, ngambika urang laki bukai ti ukai *mahram* iya enda ulih meda sebarang utai ba tubuh iya sereta utai ti ngias iya. Semua tubuh nya tadi ditutup magang enggau gari iya tauka sida iya diau ati diri dalam rumah.

Dalam Kitab ***Jilbab al-Mar'atil Muslimah fii Kitabi wa as-Sunnah***, 1412H, m/s. 111), Imam Albani nerangka;

“Wajib ngagai semua bala indu sekali’ka sida ti merdeka tauka ti nyadi ulun ngambika nutup jilbab ka tubuh sida iya lebu pansut ari rumah tauka lebu betemu enggau sida laki ti *ajnabi*. Sida iya semina ulih ngayanka mua sereta dua tapa jari aja nitihka pengawa ari maya Nabi s.a.w laban bisi aum Nabi s.a.w enggau sida iya.”

Lalu bisi urang nanya nama kebuah Allah s.w.t merintah bala indu muslim nutup *aurat* sida iya enggau jalai *behijab*? Lalu ka batang iya, nya ngambika ulih nyaga maruah sida iya lalu ulih mega nyeliahka sida iya ari *fitnah* ti jai.

Lalu indu ti semampai *behijab* sereta nyaga *aurat* sida iya bisi bulih hikmah ti janjika Allah SWT;

Ka terubah iya indu ti *behijab* tu nyadi tanda tauka kelai iya urang ti *beiman* sereta *betaqwa* sereta mulia. Kebuah pia perintah tu datai ari Allah lalu urang ti talukka perintah Allah sigi diberi penguntung ti besai lalu nyadi urang ti ngerejaka perintah Allah.

Kedua iya urang ti *behijab* tu ulih nyaga sida iya ari petenah (dikacau urang ti bisi ngembuan ati ti jai ka sida iya). Urang indu ti nutup tubuh sida iya ulih nyeliahka diri ari dikacau sida laki ti enda manah. Enda baka indu bukai ti ngayanka tubuh ngena gari ti enda menyana, nya tau ngasuh sida laki datai kanji tauka ulih numbuhka pengawa ati ti jai.

Allah *befirman* dalam Al-Quran ti reti iya;

“O Nabi, padahka meh ngagai bala bini kita, bala anak indu kita sereta bala bini urang mukmin, asuh meh sida iya bejilbab (besuyuk sereta begari panjai ka baruh) nutup tubuh sida iya. Iya ka baka nya ngambika sida iya ulih dikelala sereta enda dikacau. Lalu Allah ti Pemadu Pengampun sereta Pemadu Penyayau.”(Surah Al-Ahzab:59)

Lalu ka tiga iya ngambi ka indu kitai muslim ulih dikelala. Lalu indu kitai muslim ka ngena gari ti *behijab* ulih dikelala enda sebaka enggau sida ka ukai Islam. Tentu meh nyamai dikelala laban indu urang Islam tampak mulia sereta tuchi laban bisi maruah ka tinggi.

Nyadi nya meh sekeda ari *hikmah* kebuah Islam ngewajibka sida indu muslim nutup aurat sida iya ngena jalai *behijab*.

14_

**NGEMENDARKA JANJI SEMAYA
ULAH TI MANAH**



Bekenangka pengawa ngemendar-ka janji, semua urang nemu reti jaku nya. Taja pia, enda semua urang ulih nitihka semaya ti udah disempekat.

Ngemendarka ka semaya tu ukai semina ka betemu enggau bala pangan diri. Pengawa ngemendarka semaya tu, nyengkaum semua pengawa. Siti chunto ia, ianya besemaya enggau bala anak. Maya hari pengada sida iya, kitai udah besemaya deka bebelika perais. Nyadi maya ari nya ila, anang tau enda meli perais nya tadi. Nya ka dikumbai ngemendarka semaya. Pia mega pengawa ngemendarka semaya enggau bala anak tu mega mai pengaga ati ka sida. Pengawa bersemaya ia ka suah amai nyadi maya hari tu ianya semaya ka betemu enggau bala pangan.

Ba pengarap Islam, ulah ngemendarka semaya tu, dalam pekara besai tauka mit sigi dikemeratka. Laban pengawa besemaya tu, bisi diterangka ba Al-Quran, reti iya:

“Lalu anang meh kita ngambik reta anak patu balu, kelimpah ari enggau chara ti manah agi, dataika maya iya udah besai (Baligh) lalu kemendarka meh semaya; iaka bendar semaya nya sigi dipinta tanggung pengawa.” (Surah Al-Isra: 34)

Ari leka jaku nya tadi, madahka kitai enggau silik. Enti udah bersemaya enda ngira naka ni pelayuh macham penanggul, semaya enda tau laun dikereja, nitihka maya enggau hari ti udah disemayaka tadi. Pia mega pengawa ngemendarka semaya tu ka bendar iya nyadi siti ari kelai pemanah ulah kitai ti muslim ka chulin. Kelimpah ari nya ngembuan ulah ngemendarka semaya ngasuh kitai majak dikerinduka ulih urang bukai.

Ngambika nyadi pengingat kitai, enti udah besemaya lalu bisi datai sebengkah penanggul ti enda ulih ditunda, kitai patut madahka urang nya tumu agi, ngambika iya enda lama nganti. Enti ulih, udah nya ngaga semaya ka baru, ba hari tau ka maya bukai, ngambika urang nya tadi lantang ati.

Enti sema kitai bedau tetemuka maya ti lantang anang beguai ngaga semaya. Sebut aja meh *Insyallah*. Laban tiap iku urang muslim ti udah besemaya, ukum ia *wajib* nitihka semaya nya tadi, enti bisi ga penanggul, ia ka enda ulih diseliahka, kitai mesti mega madah ngagai urang ka enggau kitai bersemaya nya tadi, ngambika iya enda nganti baka nganti buah engkabang ka enda labuh.

Laban siti ari ulah urang *munafik*, baka ka disebut dalam sabda Rasulullah s.a.w “tanda ulah urang ti *munafik* bisi tiga. Ianya, enti iya bejaku iya bebula, enti besemaya mungkir janji, udahnya enti diberi tanggung pengawa iya mega *bekhianat* (tipu mudi) ka tanggung pengawa nya”. (Hadis riwayat Bukhari enggau Muslim)

Baka penerang dalam *dalil* hadis Nabi Muhammad s.a.w nya tadi, iaka bendar madah ka kitai, pengawa besemaya tu, pepadu dikemeratka ba pengidup urang muslim. Nyentuka rega diri tau'ka *maruah* urang muslim tu tadi dipeda ari penaka ni iya ulih ngendarka semaya.

Nyadi, urang muslim, kitai patut selalu ingatka semaya, iaka udah disempekat tauka ditancang nya tadi. Enti nyema lebu besemaya nya tadi, bisi urang ninga tauka nyadi saksi, nadai penyalah enti kitai minta tulung iya ngingatka kitai enti sema kitai enda ingat.

Nitihka penemu tauka runding kitai maya hari tu, patut dikeingatkan kitai semua, pengawa ngemulaka semaya tu sigi enda manah. Laban, dudi hari, orang udah enda pechaya ka iya agi. Pengawa enda ngemendarka semaya tu mega ulih nyadika laya enggau pangan diri, nyentuka ia nyadi orang *munafik* sereta enda ulih diberi tanggung pengawa.

Mayuh, pemanah ka diulih kitai ari pengawa ngemendarka semaya tu. Entara ia, semampai dikerindu enggau dikesayau sereta dipechayaka urang bukai. Kelimpah ari nya kitai mega makin dipebasaka urang mayuh. Nyadi, aram meh kitai semua raban muslim sama-sama neleba diri empu ngembuan pengawa ngemendarka semaya tu tadi.

15_

PEMANAH PENGAWA PEMERESI DALAM ISLAM



Pengarap Islam sigi ngemeranka pengawa nyaga pemeresi. Pemeresi ati sereta batang tubuh, kedua-dua nya sigi sama bela dikemeran. Pengawa pemeresi tu udah suah amat dikerandau. Laban, pemeresi sigi utai ti manah sereta patut dikembuan ba pengidup tiap iku bala kitai.

Pemeresi ukai semina manah ke pengerai diri, tang ulih mega nyeliahka kitai ari sebarang bengkah penyakit. Sekalika penyakit nya tau ngerampit tauka enda. Kelimpah ari nya, pengawa pemeresi tu mega nyadi siti ari tanda kitai ngembuan pemujur enggau pemansang menua.

Ba pengawa tu, reti pemeresi ti diterangka tu nyengkaum semua bengkah pemeresi diri, urang bukai ti begulai enggau kitai sereta pemeresi rampa menua mega.

Tang taja pia, pengawa pemeresi tu udah nadai agi dikemata enggau manah ari semua kitai. Kelebihan agi pemeresi rampa menua. Enti diperatika, pemeresi rampa menua tu ka bendar ia sejalai enggau pemansang menua serta bala mensia.

Kelimpah ari nya, pemeresi tu mega siti ari bengkah pengawa ti dikemeratka ba Islam. Pengawa pemeresi ba Islam, ukai semina diasuh tang udah nyadi ari siti sebengkah ari iman. Dalam siti jaku genteran Arab ti reti iya: "*Pemeresi ianya sebengkah ari iman*". Lalu genteran nya deka sebaka enggau sabda Nabi s.a.w ti reti iya: "*Betuchi (taharah/Ath-thahuuru) nya sebengkah ari iman*" (Hadis Hasan Imam Ahmad, Muslim enggau Tirmidzi).

Kelimpah ari nya, hadis nya tadi, ukai semina madah ka pengawa pemeresi tu patut nyadi kelai pemanah pengarap Islam, tang kelebihan agi pengawa pemeresi tu mega siti ari pengawa ti diajar enggau dikemaranka ba pengarap Islam.

Senentang pemeresi diri empu, siti chunto ka mudah, Islam ngasuh kitai mandi, laban mandi sebengkah ari chara dikena kitai meresi tubuh diri. Pengarap Islam ngajar kitai meresi jari ka terubah ia ari semua utai ti kamah.

Laban, enti jari ti kamah enggaika ngerampit tubuh bukai ti beresi, awakka pengamah nya tadi enda ngamahka tubuh tauka gari ti dikena. Enti kitai nitihka semua utai ti diajar ba pengarap Islam tu, ka bendar iya kitai udah nyeliahka diri ari semua bengkah penyakit.

Kelimpah ari mandi, pengarap Islam mega ngajar kitai bersugi tauka merus ngeli, mapal kukut, nyuci ragam tauka buk laban semua batang tubuh kitai tu ulih ngundan mayuh bengkah penyakit enti enda diberesi.

Ba pengarap Islam, pemeresi tu nyengkaum semua utai. Bepun ari pemeresi diri, gari, utai pakai, palan alai diau, rampa menoa, nyentu ka ngagai pemeresi ati diri.

Bisi siti hadis ari Muaz bin Jabal R.A., Nabi besabda:(reti ia)“*Seliahka tiga bengkah endur ti dilaknat lebu may birak; ba endur pun penatai ai, ba tengah jalai sereta endur urang berteduh (Riwayat Abu Daud).*”

Hadis nya tadi nerang-ka kitai, kelimpah ari nagang kitai birak ba sebarang alai, Islam sigi ngemeratka pengawa pemeresi diri enggau rumah, sereta rampa menua.

Nyadi, kelimpah ari nya pemeresi ai tu patut dijaga enggau manah. Laban ai tu pepadu beguna ba pengidup kitai mensia. Nitih-ka pansik penemu ti udah digaga urang, kitai mensia tau idup enti enda makai asi ba kandang tiga minggu, tang kitai enda ulih idup enti enda ngirup ai dalam pengelama tiga hari. Kebuah pia ketegal 70% ari batang tubuh kitai tu ngembuan ai. Ngagai urang ti kurang ngirup ai, iya tau bulih penyakit baka sakit batu karang, pedis pala, pedis tulang, pedis tubuh, lemi tubuh enggau aus. Ai kemi” megaka bebau amai enggau bewana kuning pekat. Nya ka tanda urang nya ngembuan *Dehidrasi* (Kurang ai).

Lalu kitai patut ngambi lalau, enti nadai ai beresi, ukai semina ngasuh kitai bulih penyakit, tang ulih mega nabanka nyawa. Laban dunya sari tu nadai baka suba. Ai sungai, ai tasik, nyentukke ai

ujan, semua nya udah enda ulih diarpka pemeresi ia agi. Kelimpah ari nya, penyakit ti datai ari ai ti kamah pan mayuh mega. Chunto ia, pemayuh alai nyamuk aedes betelu tau ngujongka mai penyakit denggi ngagai mensia.

Genturung pendiau ti manah sereta beresi mega, iaka bendar nyeliahka kitai ari sebarang penyakit. Tu nyengkaum nyeliahka kitai ari jelu ti mai penyakit baka chit. Chit tu deka amat ka endur ti kamah. Uдах nyadi tanggung pengawa kitai nyaga pemeresi palan alai kitai diau. Laban, palan pendiau ti enda beresi mayuh penyakit, nyentukka mai nyawa. Nyadi setegal nya kitai mesti ka nyaga pemeresi diri enggau endur kitai diau.

16_

IMAM AS-SYAFIE _1



Ngenang sekeda ari urang ti nyadi mensia tebilang dalam mayuh bengkah penemu, arapka kitai ulih ngambi lalau ari jerita sida iya lalu ulih nyadika chunto dalam pengidup kitai.

Ngenang siku Imam kitai ti chukup tebilang iya nya Imam As-syafie ti nyadi Imam ti ngepunka Mazhab Syafie iya siti ari 4 iti Mazhab ahli sunnah Wal Jamaah ti dipegai umat Islam ba dunya saritu. Nyadi, arapka kitai nemu enggau pansik agi senentang Imam tu sereta tau ngambi iya ka chunto kitai.

Nama bendar iya ianya Muhammad bin Idris bin Al-`Abbas bin `Usman bin Syafi` bin AsSa`ib lalu jurai peturun iya datai ba `Abdul Manaf akik Nabi. Gelar Asy-Syafi`ie ngangkatka nama akik iya Syafi` bin As-Sa`ib.

Iya ada ba Ghazzah (Gaza), Palestine, ba taun 150H/767M ia nya taun pematil Imam Abu Hanifah An-Nu`man bin Tsabit. Maya nya agi dalam perintah Khalifah Abu Jaafar Al-Mansur ba kota Baghdad.

Sebedau ngada ka iya, indai iya bisi bemimpi meda siti bintang pansut ari perut iya lalu niki ka langit. Udahnya bintang nya pecah lalu labuh beteberai ba bumi. Cahaya ari bintang pecah nya nerangka selampur bumi tu. Indai iya tekenyit maya nemu laki iya mega bisi mimpi ti sama meda siti bintang pansut ari perut bini iya. Apai enggau indai iya urang asal ari menoa Makkah lalu sida iya bejalai ka Palestin lebu Asy-Syafi`ie agi dalam kandung. Apai iya mati lalu udahnya Asy-Syafi`ie pan ada. Lebu umur iya 2 taun, sida pulai baru ka Makkah lalu diau ba Sya`bu l-Hayf.

Iya mega ngembuan pengineat ti kering, terang ati, rajin sereta ngembuan ulah ti pengambis manah. Indai iya Fatimah binti `Abdi Llah bin Hasan bin `Aliy bin Abi Talib. Iya mati lebu 29 Rajab tahun 204H/820M ba Mesir.

Imam Asy-Syafi`ie berengkah belajar Al-Qur'an lebuah iya beumur lima taun lalu udah ngapal Al-Qur'an lebuah iya manggai tujuh taun. Imam Asy-Syafi`ie ngembuan pengineat ti kering, cukup landik sereta pintar, sereta ulih ngapal semua penemu ti diajar. Lebuah maya pengajar iya enda ulih ngajar kebuah bisi pengawa ti bukai, iya suah diasuh nganti pengajar iya ngajar sida anemiak bukai.

Imam Asy-Syafi`ie nguasa *ilmu* Al-Quran, hadis, Bahasa Arab sereta lahjah iya, sereta landik dalam nulis sereta sya`ir.

Imam As-Syafi'e mega siku ulama ti nyekal pengawa bid'ah. Ku iya, semua pengawa ti digaga enda sejalai enggau Al-Quran , As-sunnah tauka ijmak ulama sigi bid'ah ti jai sereta tesat. Tang barang utai ti manah sereta enda nyalah semua utai ka tadi ia bid'ah ti terpuji.

Imam As-Syafie bepegai enggau fahaman Ahlu Sunnah Wal Jamaah baka 3 iku Imam Mazhab bukai ti tebilang baka Imam Abu Hanifah (Mazhab Hanafi), Imam Malik bin Anas (Mazhab Maliki) sereta Imam Ahmad Bin Hanbal (Mazhab Hanbali).

Di Madinah, Imam Asy-Syafi`ie belajar enggau Imam Malik bin Anas, Ibrahim bin Abi Yahya As-Samiy, Muhammad bin Sa`id bin Abi Fudayl sereta `Abdu Llah bin Nafi` AsSani`. Imam Asy-Syafi`ie ngapal kitab Al-Muwatta' Imam Malik lebuah umur iya 10 taun maya iya ba Makkah sereta bedau kala betemu Imam Malik.

Kitab Al-Muwatta iya nya kitab ti tebilang bendar maya nya. Imam As-Syafi'e udah nya *behijrah* ka Madinah belajar enggau Imam Malik. Maya nya Imam As-Syafi'e baru beumur 20 taun lalu iya terus duduk enggau Imam Malik dataika Imam Malik udah nadai ba taun 179H/796M.

17_

IMAM AS-SYAFIE _ 2



Nyadi baka ti diterangka Imam as-Syafi'e ngambi pengawa Imam Malik bin Anas ti nyadi pengajar ba Masjid Nabawi di Madinah. Uдах nya iya diberi pengawa nyadi Gabenor Yaman. Tang iya enda lama ba negeri Yaman kebuah ka petenah nyadi urang ti nitihka mazhab Syi'ah. Iya mega dipasung lalu dianjung ka jel di Baghdad, ti nyadi palan Perintah Dinasti Abbasiyyah maya nya.

Lebuh iya betemu enggau Khalifah Harun ar-Rashid sereta nunjukka pemandai iya baru iya dilepaska ari jel lalu iya diau ba Baghdad lalu belajar enggau sida ti bepegaika mazhab Hanafi. Iya mega belajar enggau mayuh pengajar bukai nyengkaum pelajar Imam Abu Hanifah empu ti tebilang ka benama Muhammad bin al-Hasan as-Syaibani.

Nyadi ba Bagdad tu iya bulih penemu ti mayuh agi ulih manding ka ajar Islam iya nya penemu Imam Malik bin Anas enggau penemu Imam Abu Hanifah.

Ba taun 188H/804M, Imam as-Syafi'e mega lalu *behijrah* ngagai Mesir. Iya bisi ngetu enda lama ba Makkah deka ngerembaika penemu iya. Tang ajar iya enda diterima laban urang Makkah agi bepegaika ajar Imam Malik.

Ba taun 194H/810M, Imam as-Syafi'e pulai ngagai Baghdad, lalu diau ba Baghdad 4 taun. Taja pan diberi pengawa nyadi Kadhi tang iya enda nerima pengawa nya.

Taun 197H/814M, Imam as-Syafi'e pulai ka Mesir lalu muka palan iya ngajar ba menoa nya.

Imam as-Syafi'e mati 29 Rejab taun 204H/820M ba Mesir maya umur iya 54 taun (Hijrah). Iya dikubur ba Al-Qarafah udah sembayang Asar.

Lalu Imam As-Syafie udah ninggalkan legasi ti mayuh meri guna ngagai *umat* Islam dataika sari tu. Iya ngepunka kaedah-kaedah/chara ba meri ukum baka ngena hadits ti *sahih* kena ukum enggau enda meda status iya.

Iya mega enda nerima kaedah istihsan nyadi batang Syariah/ undang-undang Islam. Iya mega nyekutka jalai nguna akal aja dalam mesabitka ukum agama. Iya mega udah ngajar jalai *bejjihad* ntihka endur sereta maya. Iya mega mayuh meri penerang ngelaban sida ka anti-hadits, baka ka disebut ba kitab Ar-Risalah. Iya mega amat pansik meri penemu kelebihan agi dalam *masalah* ibadah.

Iya ninggalka ngagai dunya Islam siti kitab ti tebilang bendar dalam penemu / ilmu *Usul Fiqh* iya nya 'ar-Risalah'. Kitab tu kitab ka terubah ti nerangka kaedah-kaedah/ chara mansutka ukum ari nas al-Qur'an enggau as-Sunnah.

Kelimpah ari nya mega Imam as-Syafi'e ninggalka kitab fiqh iya ti tebilang ia nya 'al-Umm', Ikhtilaful-Hadis, Al-Musnad sereta mayuh agi kitab ka bukai mega.

Lalu saritu, Mazhab Imam As-Syafie tu udah ngerembai sereta nyadi Mazhab mayuh bala umat Islam kelebihan agi ba Malaysia, Indonesia, Brunei enggau Thailand.

Lalu penemu Imam as-Syafi'e ditampung bala pelajar iya baka Abu Yaaqub al-Buwayti (231H/846M), Rabi' bin Sulaiman al-Marali (270H/884M) enggau Abu Ibrahim bin Yahya al-Muzani (274H/888M). Nyadi nya meh jerita ti ulih dikungsi kitai senentang Imam As-syafie.

18_

BINI SOLEHAH



Ba pengawa nirika siti ruang bilik mesti semua urang deka ka ruang bilik ti digaga nya nyadi diri sebilik ti ngembuan pengelantang, menyenangkan enggau *rahmat*. Selingkah ari mesti ka bisi ngembuan laki ka soleh, ruang bilik ti didirika nya mesti bisi bini ka solehah.

Senentang bini ti *solehah* tu kitai sama bela merening sereta meda kelai bini ti *solehah*. Keterubah ia bini *wajib* nyerahka diri ngagai laki iya udah seduai iya sah nyadi melaki bini. Mesti deka talukka jaku laki seagi enda ngelanggar ukum agama, enda pansut rumah sengapa semadi bisi minta pemendar ngagai laki iya, diau ba rumah ka udah disediaka laki sereta begulai manah nyadi diri melaki bini.

Kedua, bini *solehah* mesti deka ngemeratka hak laki ari apai indai iya. Allah s.w.t ngampunka dusa bini ti ngemeratka hak laki iya ari apai indai.

Ketiga, kitai indu tu mesti nensam perening mata kitai ngagai laki bukai enggau nyaga rega rega diri tauka *maruah* kitai indu.

Keempat, kitai ti nyadi bini mesti deka ngias diri ba mua mata laki kitai empu. Enda tau nganta tauka berias ka laki bukai.

Kelima, bini mesti deka nemu sereta nerima enggau ati ti *ikhlas* ka diri senentang bala laki nyadi ketua kitai urang indu.

Keenam, semua kitai indu ka udah nyadi bini, mesti ngulihka pengerindu sereta *redha* laki. Enti bini udah nadai ninggalka dunya tu dalam *redha* laki iya, nyadi, mudah meh iya masuk serega.

Ketujuh, bini mesti taluk ngagai laki iya seagi enda ngelanggar ukum Allah s.w.t sereta ukai ngaga *maksiat*.

Kelapan, bini mesti ka nyaga reta tengkira laki enggau manah.

Kesembilan, bini mesti semampai sedia begulai enggau beleman (bekengau melaki bini) sereta enda nulak enti maya laki mai begulai sama taja benung ngaga pengawa bukai. Pengawa bukai mesti dilengkaka dulu maya laki ngangauka kitai mai begulai.

Kepenudi ia semua bini mesti deka nyaga *maruah* laki enggau manah ba mua tauka ba belakang laki iya tauka maya laki iya nadai ba rumah.

Semua utai ti ba atas nya tadi ngambika nyadi lalau ngagai kitai indu ka udah nyadi bini urang. Semua nya chara belajar nyadi bini ka mentas tauka bini *solehah*. Ngarapka kitai semua sama bela mujur nyadi bini ka mentas ngagai laki kitai nitih ka perintah sereta atur laki kitai seagi enda ngelanggar perintah Allah s.w.t enggau nitihka ajar agama kitai. Arapka sama bela nyadi indu ka mereti enggau mentas ba mata laki kitai nyentukka pengujung seput kitai ila.

19_

MAULIDURRASUL



Syar Islam ngerembai dataika pepadu pemujur sereta Islam tebilang nengah semua dunya ari timur enggau barat. Tambah mega, Rasulullah s.a.w sigi tebilang ditemu nyadi siku urang ti rindu bendar nyatup silaturrahim, nulong urang ti tusah, sereta mega urang ti rindu meri utai sereta mayuh pemanah ti bukai.

Allah befirman dalam Al-Quran ba surah al-Ahzab ayat 21:

“Iya ka bendar bisi ngembuan ba dalam Rasulullah nya chunto teladan ti manah ka nuan ia nya ngagai urang ti ngarapka (rahmat) Allah sereta (penatai) hari Kiamat lalu iya mayuh nyebut Allah.” (Al-Ahzab :21)

Ayat nya nerangka Rasulullah s.a.w sigi chunto teladan pengambis manah ngagai semua umat/raban mensia. Ba diri iya sigi nunjuk ka akhlak pepadu tepuji ti nyadi pun ti ditunda umat/raban Islam (uswatun hasanah). Kelimpah ari agik mit iya udah ditarbiyah (diajar), diibun sereta dikemataka Allah s.w.t. Bala raban jahiliyah Mekah ti nyembah engkeramba sereta ngembuan chura pengidup ti nadai akhlak mega meri gelar ‘Al-Amin’ ti reti ia ‘urang ti pepadu dikarapka’ ngagai iya.

Iya dianjung nyadi Rasul ngambi ka maie rahmat ngagai semua alam (rahmatan lil-alamin) baka reti firman Allah s.w.t dalam surah al-Anbiya ayat ka 107:

“Lalu nadai meh Kami nganjung nuan O Muhammad kelimpah ari nyadi rahmat ngagai semua alam. (surah al-Anbiya:107).

Batang juluk pengawa iya nirika raban rabbani ti dilindung ‘Nur Ilahi’ (cahaya ketuhanan). Nunda akhlak tepuji Rasulullah s.a.w sigi nyadi pengawa ti wajib ba tiap iku muslim. Neleba ka diri akhlak ti tepuji dalam pengidup sari-ari, sigi sekeda ari kelai pengrindu kitai ka Rasulullah s.a.w.

Bala Rasul ngembuan 4 iti sifat (ulah) ti wajib, iya nya sidiq (jujur), amanah (dikarapka), tabligh (meri ajar), dan fathanah (pintar). Nya alai urang ti beiman, wajib ngembuan 4 sifat wajib nya;

1. Shiddiq

Reti *Shiddiq* ia nya jujur tauka bejaku utai ti bendar. Sapa ti ngembuan sifat nya enda kala bebula. Barang utai ti disebut iya sigi kena enggau pendiau ti ka bendar ia. Urang ti ngembuan sifat (ulah) *shiddiq* enda rindu bebula taja pan urang bukai enda nemu. Kebuah pia laban iya pecaya Allah s.w.t pepadu nemu semua utai ti *zahir* (tampak) tauka dalam *batin* (enda dipeda/ enda tampak).

2. Amanah

Amanah ia nya dipercaya. Tunsang ari amanah ia nya khianat/ kelepas. Urang ti ngembuan *sifat amanat*, bepegai enggau janji. Barang utai ti dikarapka ka urang bukai ka iya, sigi dikerejaka iya enggau manah. Baka Nabi Muhammad s.a.w bulih gelar Al-Amin maya iya agi mansang bujang. Gelar nya diberi ngagai iya laban iya suah bejaku bendar sereta enda kala ngemula ka janji. Firman Allah s.w.t ti reti iya;

“Iya ka bendar Allah ngasuh kita ngerejakan amanat ngagai urang ti patut nerima iya lalu ngasuh kita lebu meri ukum ba antara kita mensia, ngambika netapka ukum enggau adil. Iya ka bendar Allah meri lalau ti pengambis manah ngagai kita Iya ka bendar Allah Pepadu Peningga sereta Pepadu Pemedada. (Al-Quran, Surah An-Nisa: 58)

3. Tabligh

Tabligh ia nya ngenataika/meri ajar. Allah meri pengawa ngagai bala Rasul ngenataika ajar Iya. Pia mega bala urang Muslim, iya ngembuan pengawa ngenataika/meri ajar ngagai urang bukai taja pan semina siti ayat aja. Rasulullah s.a.w bersabda :

“Kenataika meh ari aku taja pan semina siti ayat”
Nyadi, dini aja alai endur kitai, kitai sigi patut bendar maie urang bukai ngerejaka pengawa ti manah, nulung sama bela diri sereta taluk ka perintah Allah s.w.t enggau Rasul-Iya.

4. Fathanah

Fathanah ia nya pintar tauka landik. Ba dunya tu ia ka bendar nadai urang ti beli tauka tuyu. Ia ka bisi ia nya urang ti buruk dataika penemu sida iya nadai kala diansah lalu kelama iya nyadi tumpul. Nya kebuah , ngembuan pemintar tauka landik sigi pengawa ti *harus* ba tiap iku muslim.

20_

**TANGGUNG PENGAWA APAI
INDAI ENGGAU BALA ANAK
REBAK BARU**



Mayuh bengkah penyai sereta penusah ti nyadi kebuah nadai nitihka jalai Islam dalam sistem bala raban umat Islam sari tu sigi tampak bendar ba pengidup sida iya. Penyai sereta penusah ti nyadi kebuah enda nitihka sistem Islam, ukai semina ulih disepi kitai ti diau ba menoa urang Islam aja tang barang endur mega. Tang pemedis ti chukup pedis disepi kitai lebu meda bala nemiak rebak baru ti mansang besai ba dunya ti nadai bepegai ba chara idup Islam ti dalam sekeda kes, ngasuh nemiak rebak baru tu lenyau *identiti*, lenyau *nilai-nilai* lalu sekeda ia nadai agi ngembuan agama.

Lalu enti kitai berati ka bendar nama kebuah bala nemiak rebak baru tu tau nyelimpang ari jalai agama, ka batang ia ti bendar laban dirampit bala kaban ti sama bela begulai enggau sida iya. Nya alai pengawa milih kaban sereta kaling sigi pengawa ti penting ti ulih ngetan ka *identiti* kitai muslim. Bekaban sereta bekaling enggau muslim ti manah nyadi syarat semampai ba jalai ti lurus lalu meri pengrindu ka Allah s.w.t.

Taja pan kitai bendar amat deka nyaga *identiti* muslim ba dalam kitai sebilik, tang bisi mega maya kitai enda tepeda ka bala nemiak kitai lebu sida iya ba luar rumah tauka lebu enggau komputer tauka telepun binching. Islam udah meri kitai chara ti ulih nulong kitai ngena jalai ti bendar ngambika bulih pemujur ba dunya sereta akhirat. Kitai mesti semampai bepegai ka ukum syarie dalam semua pengawa dalam pengidup sereta milih kaban ti betul.

Semampai ba jalai ti bendar sigi dikemberat ka ba siku urang muslim, ngambika enda nyelimpang ari jalai ti betul. Tang sari tu, utai ti nyadi ba nemiak kemaya ari tu udah nyelimpang sereta rusak. Sida iya udah bejaku pengawa seks ti salah, deka mantai ka penglebih diri, sereta rindu begulai nadai nitihka adan ti ditentuka syarak. Utai ti baka tu meh ulih ngasuh sida iya lari ari jalai ti lurus sereta jauh ari jalai Islam.

Nabi s.a.w bisi besabda:

“Chunto kaban ti’ manah ia nya’ baka banding urang ti’ nyual minyak

angi enggau tukang ngambuh duku; ari urang ka terubah nuan ulih meli minyak angi iya tauka ulih nyium bau rengut iya. Tang enti enggau urang ti ngambuh duku, nuan ulih diempa api ti nunu gari nuan, tauka nuan bulih bau asap ti nepok iya.”(Hadis Riwayat Imam Bukhari)

Islam sigi ngaku kaban ti manah ti tau mai pemanah enggau urang ti begulai enggau iya sereta iya tau ngeringka agi penaluk iya enggau Allah s.w.t.

Nabi Muhammad s.a.w bersabda ti reti ia:

“Siku urang nitihka *deen* (chara pengidup) kaling iya ti dampih. Nya alai peratika meh enggau manah sapa-sapa ti dipilih kita nyadika kaling.”(Riwayat Imam Tarmizi)

Urang Islam patut ngiga kaling ti ulih madahka sereta ngingatka iya ngagai Allah s.w.t ngambi ka iya enda labuh nitihka jalai Sitan. Pengrindu ba antara dua iku urang muslim ti bekaling deka meri pengarap ka sama diri, deka nulong leboh maya ti berguna ka tulong sereta maya tusah sereta ulih ngeringka agi bepegai enggau *ad-din* / agama Allah s.w.t. Lalu Nabi s.a.w suah bepesan ngagai bala muslim ti sigi rindu ka pangan sida iya anang ngelalaika pengrindu sida iya nya.

Dalam Hadis ti diriwayatka Imam Al-Bukhari Nabi s.a.w besabda ti reti ia:

“enti siku ari kita ti rindu sereta sayau ka siku menyadi iya ketegal Allah s.w.t, lalu patut meh iya madahka kaling iya laban pengawanya ulih nambahka agi pengrindu sereta penyayau.”

Kelimpah ari diau ba pendiau ti betul, tanggung pengawa bala sida apai indai ba bala anak laki sereta indu sida iya pan sama bela penting. Bala apai indai bisi tanggung pengawa meratika enggau sapa anak sida iya bekaling sereta begulai. Sida iya mesti enggau naka ti ulih ngembuan pengarap ari bala anak sida iya enggau chara sama bela *aktif* dalam pengawa sida iya. Pia mega ngasuh sida iya dalam aktiviti ti bukai ti ulih muka jalai bala anak

betemu sereta bekaling enggau raban urang ti menyana sereta betul. Kaban ti baka nya ulih numbuhka igik benih ka ngemesaika agi bala *komuniti* muslim sereta nyaga *identiti* sida iya nyadi urang muslim.

Bala apai indai mega patut bendar ngajar bala anak sida iya senentang *standard* utai ka halal sereta utai ka *haram* ti nyadi batang utai ti diperatika dalam pengidup mereka. Tang pemayuh penyalah ba bala apai indai muslim sari tu ti enggai nanggung pegawai ti besai agi ba bala sida sebilik, ti ngujungka sida iya enda bulih pengarap ari bala anak sida iya sereta ngelakka sida anak iya empu nerima sebarang utai ti ditemu sida iya dalam pengidup dalam nengah jalai pengidup ti bemacham utai nyadi.

Nya alai bala apai indai mesti sama bela megai pengawa ti besai agi dalam ngajar sereta meri lalau ngagai bala anak, nitih ka jalai pengidup ti lurus ti diajar Islam.

Lalu pengawa ka tiga , bala apai indai patut mega mai bala anak tu rindu ka Masjid /Surau. Enti ulih ari mit agi sida iya kelebihan agi enti sida udah mumaiyiz / datai ba umur ti nemu utai ti betul enggau utai ti salah.

Lalu ba Mesjid tu dia sida iya ukai aja nirika *solat Fardhu* tang mega mayuh bengkah ibadah bukai ti tau ngujungka sida iya nyadi urang ti rindu ka Masjid.

Firman Allah s.w.t dalam Al-Qur'an:

"Semina ti ngerami Masjid-masjid Allah ia nya urang ti beiman ngagai Allah sereta Hari ka dudi, sereta tetap nirika solat, mayar zakat sereta nadai takut (ngagai sapa pan) kelimpah ari Allah, lalu sida tu meh urang ti dikarapka lalu sigi digaum urang ti bulih *petunjuk*." (Surah At Taubah:18)

Lalu dalam mayuh Hadis mega, Nabi s.a.w suah mega dipeda maya nemiak mit ka masjid.

“Ari Abi Qatadah r.a. iya madahka, “Aku kala meda Nabi s.a.w ngimamka urang solat, lalu Umamah binti Abil-Ash ti anak indu ari anak indu iya empu Zainab bisi diberap iya. Lebuah iya s.a.w ruku, anak nya diengkahka iya lalu lebuah iya angkat ari sujud anak nya diberap iya baru”.(HR. Muslim)

Ari Syaddad Al-Laitsi r.a. Iya madahka, “Rasulullah s.a.w pansut deka *solat* ba siang ari engka dzuhur tauka ashar, benung ngema siku uchu iya engka Hasan tauka Husain. Lalu lebuah sujud, iya ngerejaka nya lama amat. Lalu aku ngangkatka pala aku, meda bisi nemiak mit ba atas punggung iya s.a.w. Lalu aku sujud baru. Udah Rasulullah s.a.w tembu solat, urang nanya, “O Rasulullah, nuan sujud lama amat ngasuh kami nyangka bisi utai ka nyadi tauka bisi turun *wahyu*.” Iya s.a.w nyaut, “Semua nya nadai nyadi, tang uchu aku tu nepan ba belakang aku , lalu aku enggai berumban dataika iya puas bemain. (HR. Ahmad, An-Nasai dan Al-Hakim)

Nyadi nya alai bala apai indai patut bendar nitihka chara Nabi ti mai anemiak mit sekalika anak tauka uchu bejinak-jinak enggau masjid tauka surau ngambi ka sida iya semampai rindu bejalai ba rumah Allah s.w.t.

Lalu kelimpah ari maie bala anak tu dampih enggau masjid, kitai apai indai mega mesti maie bala anak tu dampih enggau Al-Qur’an. Lalu ari sida iya agi mit, sida iya patut berengkah belajar ngelala uruf Al-Qur’an sereta belajar macha. Nya kebuah ayat ka terubah iya ti diturunka ngagai Nabi s.a.w ia nya senentang macha. Firman Allah s.w.t dalam Al-Qur’an;

“IQRA BISMILAH RABBI KALLADZI KHALAQ”

“Bacha meh enggau nama Tuhan ti ngaga (kita)”

Lalu Al-Qur’an tu ukai sengapa bup tang ia sigi kitab ti nyadi pesindang ti ngajar semua pekara dalam pengidup kitai mensia. Kitab Al-Qur’an tu meh nyadi petunjuk ka semua pekara lalu ulih netapka pengidup kitai ti tetap ba jalai ti lurus.

Lalu bala anak kitai patut lebih mayuh agi maya sida iya enggau Al-Qur'an. Tang sari tu kitai berati ka mayuh anak kitai rindu agi ngemasau ari enggau main mayuh bengkah game ba komputer, *tablet*, tauka telepon binching sida iya. Baka ka sari tu bala nemiak rindu amat enggau game baka *PUBG Game* ti nyadi *game* ti *virai* semua endur ba dunya sari tu. Bedau agi mayuh bengkah game bukai ti muai jam bala nemiak kitai.

Sari tu sida iya mayuh agi ngemasau jam enggau macha *wassaps*, meda *facebook* tauka mua bup, nganjung gambar ba *Instagram* sereta enda badu meda internet ti enda tentu bisi tapis ari apai indai. Lalu enti bala apai indai ngelak ka aja bala anak enggau pengawa ti baka tu, ni maya sida iya ulih macha Al-Qur'an? Ni maya sida iya ulih dampih enggau jaku lalau sereta jaku tangkan ti dipadahkan Allah s.w.t dalam Al-Qur'an?

Nya alai bala apai indai patut bendar numbuhka pengrindu bala anak enggau Al-Qur'an tu ngambika sida iya mengkang ngembuan Al-Qur'an taja pan dunya penuh enggau bemacham bengkah pekara pengrindu ti bukai ti tau nyeliahka sida iya ari jalai idup Islam ti bendar.

Nya alai bala apai indai mesti sama bela megai pengawa ti besai agi kena ngajar sereta meri lalau ngagai bala anak, nitih ka jalai pengidup ti lurus ka diajar Islam.

REFERENCES

Rafflesia

<https://forestry.sarawak.gov.my/modules/web/pages.php?mod=webpage&sub=page&id=681>

Normah Orchid (Phalaenopsis Bellina)

<https://sarawaktourism.com/attraction/dbku-orchid-garden/>

Pitcher plant or Nepenthes of Sarawak

<https://www.nhpborneo.com/book/a-pocket-guide-pitcher-plants-of-sarawak/>


Pua Kumbu

https://en.wikipedia.org/wiki/Pua_Kumbu


SARAWAK ISLAMIC INFORMATION CENTRE (SIIC)

Officially opened to the public on 17th August 2008

THE DRIVERS



MAIN FUNCTIONS OF THE CENTRE





SADA
— KITAI



**SADA
_KITAI**